

Uunga siunnersuut: Inuit innarluutillit tapersorneqarnissaannut Inatsisartut inatsisaat nr. xx, xx. xxx 2019-imeersoq

Kapitali 1

Aalajangersakkat aallarniutaasut

Siunertaq aamma siunertarineqartut

§ 1. Inatsisartut inatsisaanni matumani siunertaapput:

- 1) inuit innarluutillit innarluuteqarnerup malitsigisaanik ajornartorsiutit siunnersorneqarnissamik tapersorneqarnissamillu neqeroorfigineqarnissamik qulakkeerinniffigineqarnissaat,
- 2) inuup imminut ikiorsinnaanissaanik siuarsaneq, ulluinnarni inuuneranik oqilisaassineq kiisalu inuunerinnerulersitsineq,
- 3) inuup innarluutillip ineriartorsinnaanissaanik aamma piginnaasai naapertorlugit nammineq periarfissaqarfiinik atorluaasinnaanernik siuarsaneq,
- 4) inuit innarluutillit inuiaqatigiinni naligiimmik periarfissaqarnissaasa aammalu innarluuteqarnek pissutigalugu assigiinngisitsinissap pakkersimaarneqarnissaata tamatumuunalu sapinngisamik inuiaqatigiinni tamakkiisumik sunniuteqarluartumillu peqataanissaasa akuunissaasalu qulakkeerneqarnissaa, aamma
- 5) ataasiakkaat sulisinnaanissaannut periarfissat siuarsarnissaat.

§ 2. Inuk innarluutilik allat assigalugit inuit pisinnaatitaaffiinik aamma tunngaviusumik kiffaangissuseqarsinnaatitaanerannik tamaginnik tamakkiisumik iluaquteqarsinnaatitaavoq. Inatsisartut inatsisaat manna malillugu tapersiineq pisinnaatitaaffinnik taakkuninna qulakkeerinneqataassaaq.

Imm. 2. Inuup innarluutillip pissusissamisoortumik ataqqinassusaa, inuttut nammineersinnaanera, matumanilu kiffaangissuseqarluni aalajangiisinaanera inunnillu allanik attuumassuteqannginnera ataqqillugu, Inatsisartut inatsisaat manna malillugu tapersersuineq pissaaq.

§ 3. Inuk innarluutilik ataqatigiissaagaasumik, ataqatigiissumik tamakkiisumillu isiginnittumik, inummut tunngasut tamaasa aamma inuup inuunera mianeralugit, tapersorneqarnissaminut pisinnaatitaavoq.

Imm. 2. Inunnut ataasiakkaanut pitsaannerusussaq anguniarlugu ataatsimut isiginninneq aallaavigalugu Inatsisartut inatsisaat manna malillugu aalajangiinerit pissapput.

Imm. 3. Inuup innarluutillip nammineq isumai, nammineerlunilu piginnaasai ineriartorneranilu killiffia pisuni tamani sapinngisamik mianerineqassapput.

§ 4. Inuup innarluutillip, aamma inummut taassumunnga angajoqqaatut sinniisuusup imaluunniit angajoqqaatut akisussaasut kissaatigippassuk, inuk innarluutilik angerlarsimaffimmiiginnarnissaminut tapersorsorneqarnissaminik pisinnaatitaaffeqarpoq. Taamaalorsinnaanissamut nammineq angerlarsimaffimmiiginnarnerup, inuup innarluutillip imaluunniit allat atugarissaarnerisa navianartorsiortinneqannginnissaat piumasqaataavoq.

Imm. 2. Inuk innarluutilik, inuk tamatuminnga pisariaqartitsippat, inissatut neqeroorummi immikkut ittumik tapersorsorneqarnissaminut pisinnaatitaavoq.

§ 5. Pisortat illuutaat atortorissaarutaataallu sapinngisamik ima aaqqissuunneqassapput inuit innarluutillit isersinnaanissaat atuisinnaanissaallu qulakkeerneqassalluni.

Sullinniakkat

§ 6. Inatsisartut inatsisaat manna, ukiut apeqqutaatinnagit, inunnut innarluutilinnut Kalaallit Nunaanni najugaqartunut, atuuppoq.

Imm. 2. Inuit innarluutillit tassaapput inuit ataavartumik timikkut, tarnikkut, silassorissutsikkut imaluunniit malugisaqarsinnaanikkut piginnaanikillimasut, aporfiiillu assigiinngitsut sunniivigeqatigiinnerisigut, allat assigalugit inuiaqatigiinni tamakkiisumik sunniuteqarluartumillu peqataanissaannut akornuserneqartut.

Imm. 3. §§ 50-51-imi kiisalu maleruagassat kiisalu najoqqutassiat § 55, imm. 8, aamma § 56, imm. 4 malillugit aalajangersagaasut aammattaaq inunnut innarluutilinnut, pisortat tapersiinermi iliuuserisaannik Kalaallit Nunaata avataani inissinneqarsimasunut, atuupput.

§ 7. Meeqqat, inatsisartut inatsisaat manna aammalu Meeqqat tapersorsorneqarnissaannut Inatsisartut inatsisaat tunngavigalugit tapersorsorneqarnissamik pisinnaatitaasut, Inatsisartut inatsisaat taakku marluk tunngavigalugit pisariaqartitaminnik tapersorsorneqassapput. Ataqtigiissaakkamik kiisalu meeqqamut pitsaanerpaasusaaq aallaavigalugu tapersorsuineq tunniunneqassaaq.

Imm. 2. Meeqqamut innarluutilimmut tapersorsuinerup Inatsisartut inatsisaat manna malillugu aallartinneqartup, meeqqat tapersorsorneqarnissaannut Inatsisartut inatsisaat aammalu inatsisit allat malillugit meeqqamut tassunga suliniuteqarnermut aallartinneqartumut, ataqtigiissinneqarnissaa kommunalbestyrelsip isumagissavaa. Meeqqamut immaqalu meeqqap ilaqtanaanut imaluunniit meeqqap isumassuisuinit tapersorsuineq Inatsisartut inatsisaat manna malillugu aallartinneqartoq, inatsisit allat malillugit ilaqtariinnut suliniutigineqartunut ataqtigiissaarneqarnissaa kommunalbestyrelsip aammattaaq isumagissavaa.

Kapitali 2

Aalajangiisinnaatitaaneq aamma akisussaaffeqarneq

Tapersiinissamut periarfissat

§ 8. Inuit innarluutillit pisariaqartitaminnut tapersorsorneqarnermik pisarnissaat, aamma inunnut innarluutilinnut tapersiinissamut periarfissanik pisariaqartunik Inatsisartut inatsisaat manna malillugu peqarnissaa, kommunalbestyrelsip isumagissavaa.

Imm. 2. Najugaqatigiiffinni aamma najugaqarfinni illersugaasuni inissat pisariaqartinneqartut naammattut pigineqarnerat kommunalbestyrelsip isumagissavaa.

Ulloq unnuarlu neqeroorutit

§ 9. Inunnut innarluutilinnut ulloq unnuarlu neqeroorutini inissat pisariaqartinneqartut amerlassuseqarnissaat Naalakkersuisut isumagissavaat.

Imm. 2. § 49 malillugu inunnut innarluutilinnut, ulloq unnuarlu neqeroorutini najugaqartunut, Naalakkersuisut illersugaasumik suliffeqartitsinissamik, sammisaqartitsinissamik, katerisimaaqateqartitsisarnissanillu neqerooruteqassaaq.

Imm. 3. Suliffeqartitsinissanut, sammisasaqartitsinissanut katerisimaaqateqartitsisarnissanillu neqeroorutit pillugit maleruagassanik erseqqinnerusunik Naalakkersuisut aalajangersaasinnaapput.

Qitiusumik inissiinissamut innersuussisarfik

§ 10. Naalakkersuisut qitiusumik inissiinissamut innersuussisarfimmik ingerlatsissapput (Qitiusumik Inissiinissamut innersuussisarfik).

Imm. 2. Qitiusumik inissiinissamut innersuussisarfik pillugu maleruagassanik erseqqinnerusunik Naalakkersuisut aalajangersaasinnaapput, matumani ulloq unnuarlu neqeroorutini inissiinissaq ilanngullugu.

Inunnut Innarluutilinnut Sullissivik Nunamut Tamarmut Atuuttoq

§ 11. Inunnut innarluutilinnut sullissivimmik nunanut tamarmut atuuttumik Naalakkersuisut ingerlatsissapput, tassani suliassaassallutik:

- 1) inuit innarluutillit ilaqutaasalu Inatsisartut inatsisaat manna pillugu siunnersorneqartarnerat ilitsersorneqartarnerallu, matumani tapersersuineq pillugu aalajangiinerit naammagittaalliuutigineqartarnissaannut periarfissaqarneq ilanngullugu,
- 2) kommunalbestyrelsinut Inatsisartut inatsisaat manna pillugu siunnersuineq ilitsersuinerlu, matumani tapersersuinissanut periarfissat aamma suliassanik suliarinninneq ilanngullugit,
- 3) § 45 malillugu, inuup innarluutillip ulluinnarni sapinngisamik pitsaanerpaamik piginnaaneqarnissaa siunertaralugu, inunnut innarluutilinnut allanngutsaaliulluni sungiusaanissamik neqerooruteqarneq,

- 4) inunnut innarluutilinnut tapersersuinermit pissutsinullu ilisimasat pillugit qitiusumik sullissiviunissaq,
 - 5) kommuninut, inunnut innarluutilinnut taakkualu ilaqutaannut, innarluuteqarneq aammalu tapersersuinermit periarfissat pillugit pikkorissaanernik neqerooruteqarneq,
 - 6) § 25 malillugu, sulianilu immikkut pisariusuni kommunalbestyrelsimit piumaffigineqarneq malillugu, qulaajaaneq, aamma
 - 7) § 59, imm. 2 malillugu kommunalbestyrelsimit piumaffigineqarneq malillugu ulloq unnuarlu neqeroorummiikkunnaarnissaq pillugu suliani oqaaseqaateqartarneq.
- Imm. 2.* Inunnut Innarluutilinnut Sullissivimmu Nunamut Tamarmut Atuuttumut kommunalbestyrelsi atuineranut akigititat pillugit maleruagassanik erseqqinnerusunik Naalakkersuisut aalajangersaasinnaapput.

§ 12. Suliami aalajangersimasumi, paasissutissallu suliap suliarineqarneranut pingaaruteqarpata, Inunnut Innarluutilinnut Sullissivimmit Nunamut Tamarmut Atuuttumit siunnersorneqarnermut atatillugu, paasissutissanik inummut tunngassuteqartunik kommunalbestyrelse ingerlatitseqqissinnaavoq, matumani paasissutissat inummut aalajangersimasumut tunngassuteqartut ilanngullugit.

Imm. 2. Aatsaat inuk suliami pineqartoq, imaluunniit tassunga angajoqqaatut sinniisuusooq imaluunniit angajoqqaatut akisussaasooq akuersiteqqaarlugit imm. 1 malillugu inummut paasissutissat kommunalbestyrelsi ingerlateqqissinnaavai, taamaattoq takuuk imm. 3.

Imm. 3. Imm. 2 malillugu akuersissut tunniunneqarumangippat, imaluunniit allanik pissuteqartumik akuersissummik piniartoqarsinnaangippat, kommunalbestyrelsi paasissutissat inummut tunngasut ingerlateqqissinnaavai, matumani paasissutissat inunnut tunngasut mianerilluinnartariaqartut ilanngullugit, suliami pissutsit, matumani inuup inatsisitigut isumannaatsuunissaata eqqarsaatigineqarnera ilanngullugu, erseqqissumik pisariaqartippassuk. Ingerlatitseqqinnermut piumasaqaataavoq inuup soqutigisaanik nakkutiginninnissaq, taamaaliornerullu isertuussiinnarnissamik peqquteqarnissamut soqutigisat ersarissumik qaangersimassagai, matumani inuup pineqartup, paasissutissat tunngaviata, mianerineqarnissaata eqqarsaatigineqarnissaa ilanngullugu.

Kapitali 3

Inissatut neqeroorutiniq pilersitsisarneq ingerlatsinerlu

Najugaqaqatigiiffiit aamma najugaqarfiit illersugaasut

§ 13. Inunnut innarluutilinnut najugaqaqatigiiffinnik kommunalbestyrelse pilersitsisinnaavoq, ingerlatsisinnaavoq matusisinnaallunilu. Najugaqaqatigiiffik najugaqartunut ulluunerani tapersersuinissamik neqerooruteqassaaq.

Imm. 2. Najugaqatigiiffinnik pilersitsinissamik Naalakkersuisut kommunalbestyrelse peqqusinnaavaat, ima pisoqartillugu:

- 1) inuit marluk arlallilluunniit, § 47 malillugu najugaqatigiiffimmi ineqarnissamut pisinnaatitaasut, 18-it sinnerlugit ukioqarpata aammalu kommunimi najugaqarlutik, aamma
- 2) pineqartut taakkua ataatsimoorlutik najugaqatigiissinnaappata.

Imm. 3. Najugaqatigiiffiit pillugit maleruagassanik erseqqinnerusunik Naalakkersuisut aalajangersaassapput, matumani ilanngullugit:

- 1) najugaqatigiiffiit aqqissuunneqarnerat,
- 2) aqutsinikkut sulisoqarnikkullu piginnaasaqarfiit, aamma
- 3) sulisunut pisortanullu pinerluuteqarsimanginnermik, aamma naleqqutsillugu meeqqanik pinerliisimanginnermik uppersaammik piniarnissaq.

§ 14. Inunnut innarluutilinnut najugaqarfinnik illersugaasunik kommunalbestyrelse pilersitsinnaavoq, ingerlatsisinnaavoq matusisinnaallunilu. Najugaqarfik illersugaasoq ulloq unnuarlu tamaat tapersuinissamik najugaqartunut neqerooruteqassaaq.

Imm. 2. Inuit marluk arlallilluunniit, § 48 malillugu najugaqarfimmi illersugaasumi ineqarnissamut pisinnaatitaasut, 18-it sinnerlugit ukiullit aammalu kommunimi najugallit kommunimi najugaqarpata, Naalakkersuisut kommunalbestyrelse najugaqarfimmik illersugaasumik pilersitsinissamik peqqusinnaavaa,

Imm. 3. Najugaqarfinnut illersugaasunut maleruagassanik erseqqinnerusunik Naalakkersuisut aalajangersaassapput, matumani ilanngullugit:

- 1) najugaqarfiit illersugaasut aqqissuunneqarnerat,
- 2) aqutsinikkut sulisoqarnikkullu piginnaasassat, aamma
- 3) sulisunut pisortanullu pinerluuteqarsimanginnermik, aamma naleqqutsillugu, meeqqanik pinerliisimanginnermik uppersaammik piniarnissaq.

§ 15. Najugaqatigiiffiit aamma najugaqarfiit illersugaasut pitsaassusissaannut malitassat pillugit maleruagassanik erseqqinnerusunik Naalakkersuisut aalajangersaassapput.

§ 16. Inuk kommunimi allami inissimasumi najugaqatigiiffimmiinnissamik imaluunniit najugaqarfimmi illersugaasumiinnissamik neqeroorfigineqassasoq kommunalbestyrelse aalajangerpat, kommunalbestyrelsip inuup najugaqatigiiffimmiinneranut imaluunniit najugaqarfimmi illersugaasumiinneranut aningaasartuutit akilissavai.

Imm. 2. Imm. 1 malillugu kommunip avataani najugaqatigiiffimmiinnissaq imaluunniit najugaqarfimmi illersugaasumiinnissaq neqeroorutigineqarpat, kommunalbestyrelse najugarisap nuunneqarnerani aningaasartuutitut matussutissanik aningaasaqarnikkut tapersiinnissamik neqerooruteqassaaq.

§ 17. Kommunbestyrelse ataatsimiititaliamik pilersitsinnaavoq, tassani kommunimi najugaqatigiiffiit aamma najugaqarfiit illersugaasut tamarmik imaluunniit

aalajangersimasut, kiisalu aallartitat allat najugaqatigiiffinni aamma najugaqatigiiffinni illersugaasuni najugaqartunut tamakkiisumik isiginnittumik ataqatigiissaarinermi akuutinneqarnissaannik naleqquttuusorineqartut, aallartitaassallutik.

Imm. 2. Oqartussaasut peqataasut suliani ataasiakkaani suleqatigiinnermut ilaatillugu paasissutissat suliap suliarineqarneranut pingaaruteqarpata, inummut paasissutissat paarlaasseqatigiissutigisinnaavaat, matumani paasissutissat inummut tunngasut mianerisariallit ilanngullugit. Inummit suliami pineqartumit, imaluunniit taassuma angajoqqaatut sinniisuanit imaluunniit angajoqqaatut akisussaasunit akuersiviusumik aatsaat, uniffik siulleq malillugu paasissutissanik paarlaasseqatigiittoqarsinnaavoq, taamaattoq takuuk imm. 3.

Imm. 3. Imm. 2 malillugu akuersineq tunniunneqarumangippat, imaluunniit allanik pissuteqartumik akuersinerup piniarnissaa ajornarpat, suliami pisut, matumani inuup inatsisitigut isumannaatsuunissaata eqqarsaatigineqarnera ilanngullugu, tamanna pisariaqartippassuk, paasissutissat inummut tunngasut, matumani paasissutissat inummut tunngassut mianerisariallit ilanngullugit, paarlaasseqatigiissutigineqassapput.

Ulloq unnuarlu neqeroorutit

§ 18. Naalackersuisut inunnut innarluutilinnut ulloq unnuarlu neqeroorummik pilersitsisinnaapput, ingerlatsisinnaapput matusisinnaallutillu, matumani ulloq unnuarlu neqeroorutit matoqqasut ilanngullugit.

Imm. 2. Ulloq unnuarlu neqeroorut matoqqasooq tassaavoq ulloq unnuarlu neqeroorut matut silarliit igalaallu parnaaqatittuarnissaannut akuerisaasoq.

Imm. 4. Ulloq unnuarlu neqeroorutinut maleruagassanik erseqqinnerusunik Naalackersuisut aalajangersaassapput, matumani pilersitsineq, aaqqissugaanera, aqutsisui, ingerlatsineq kiisalu ulloq unnuarlu neqeroorummi sulisunut pisortanullu pinerluuteqarsimannginnermik aamma meeqqanik pinerliisimannginnermik uppersaammik piniarnissaq ilanngullugit.

§ 19. Inuup ulloq unnuarlu neqeroorummiinneranut ulloq unnuarlu inissiiviusumut ataatsimut akigititaq aalajangersagaasoq atorlugu kommunalbestyrelse inissiisoq akiliissaaq.

Imm. 2. Imm. 1 malillugu ullormut unnuamullu inissiinermi akigititaq atorpeqartoq, kommunalbestyrelsip inissiisimasup akiliutissaa, Naalackersuisut kommunalbestyrelsillu, imaluunniit kommunit ataatsimoorlutik sinniisaata, isumaqatigiinniareernerisigut ukiumoortumik aalajangerneqartassaaq, taamaalilluni akigititap tamarmiusup ulloq unnuarlu neqeroorutip ingerlatsinerminut aningaasartuutai matussuserneqarniassammata. Imm. 1 malillugu Naalackersuisut ulloq unnuarlu neqeroorummiinnermut akigititaq ukiumoortumik aalajangersassavaat aammalu Naalackersuisut.gl atorlugu tamanut saqqummersissallugu.

§ 20. Ulloq unnuarlu neqeroorut Naalackersuisunut ukiumoortumik nalunaarusiortassaaq. Naalackersuisut kingusinnerpaamik Inatsisartut upernaakkut ataatsimiinneranni Inatsisartunut ataatsimoortumik ukiumoortumik nalunaarusiortassapput.

Imm. 2. Ukiumoortumik nalunaarusiornermut maleruagassanik erseqqinnerusunik Naalackersuisut aalajangersaasinnaapput.

§ 21. Ukiut 4-kkaarlugit ataasiarlutik ulloq unnuarlu neqeroorutitut suliaasaqarfiup ineriartortinneqarnissaanut nuna tamakkerlugu periusissamik Naalackersuisut suliaqartassapput.

Imm. 2. Periusissami ilaatinneqassapput:

- 1) Ulloq unnuarlu neqeroorummik pilersitsineq matusinerlu.
- 2) Ulloq unnuarlu neqeroorutini ataasiakkaani siunnerfigineqartut kiisalu tassani allannguuteqartitsinissamik kissaatigineqartut.
- 3) Ulloq unnuarlu neqeroorutiniilertarneq angerlartinneqartarnerlu pillugit kommunimik suleqateqarneq, matumani najugaqaqatigiiffinnik aamma najugaqarfinnik illersugaasunik suleqateqarneq ilanngullugit.

Imm. 3. Ulloq unnuarlu neqeroorutini pisortat kiisalu kommunalbestyrelsit Naalackersuisut periusissanik suliaqarnerminni akuutissavaat.

Kapitali 4

Sulianik suliarinninnermi maleruagassat

Piffissaliussat

§ 22. Inatsisartut inatsisaat manna malillugu taparserneqarnissaq pisinnaatitaaffigineqarnersoq, taamaattoqarpallu suut tapersiissutaassanersut pillugit apeqqutigineqartut, sapinngisamik sukkasuumik kommunalbestyrelsip suliarissavai.

Imm. 2. Taparserneqarnissaq pillugu qinnuteqaatip tiguneqarneranit, aalajangiinerup pereersimanissaanut piffissaq qanoq sivisutigissanersoq, piffissamut killiliussanik kommunalbestyrelse aalajangersaassaaq. Tamanna, Inatsisartut inatsisaat manna malillugu piffissaliussisoqarsimappat, atuutissanngilaq. Piffissamut killissaliussat kommunip internettikkut quppersagaani tamanut saqqummiunneqassapput.

Imm. 3. Imm. 2 malillugu piffissamut killiliussaq, suliami aalajangersimasumi malinneqarsinnaanngippat, inuk innarluutilik imaluunniit taassumunnga angajoqqaatut sinniisoqarsimaguni sinniisuusoq imaluunniit angajoqqaatut akisussaasut, aalajangiineq qaqugu pisinnaanersoq pillugu allaganngorlugu nalunaarfigineqassaaq.

Oqaloqateqarneq

§ 23. §§ 38, 49, 58 aamma 59 malillugit aalajangiisoqannginnerani kommunalbestyrelsip inuk innarluutilik minnerpaamik ataasiarluni oqaloqatigissavaa, taamaattoq takuuk imm. 4.

Imm. 2. Imm. 1 malillugu kommunalbestyrelsip oqaloqateqarnermini inuup innarluuteqarnera mianerissavaa aammalu oqaloqateqarneq inuup innarluutillip piumasai tunngavigalugit ingerlatissallugu.

Imm. 3. Inuk innarluutilik 18-it inorlugit ukioqarpat imaluunniit nammineersinnaanngitsusut nakkutilliisuligaasimappat imm. 1 malillugu oqaloqatigineqarnera, inuk innarluutilik, taassumalu angajoqqaatut akisussaasui imaluunniit angajoqqaatut sinniisoqarsimaguni sinniisaa, peqataatillugit ingerlanneqassaaq. Taamaattoq inummut innarluutilimmut mianerisassat tamanna pisariaqartippassuk, angajoqqaatut akisussaasut imaluunniit angajoqqaatut sinniisoq akuersitinnagu imaluunniit najuutsinnagu oqaloqateqarneq ingerlanneqarsinnaavoq.

Imm. 4. Inuup inerisimanagera piginnaasaqarneralu imaluunniit suliap suussusaa eqqarsaatigalugit oqaloqateqarnerup ingerlanneqarnissaa aalajangiisuusumik naleqqutinngippat, imm. 1 malillugu oqaloqateqarneq ingerlanneqassanngitsooq kommunalbestyrelsip aalajangersinnaavaa. Oqaloqateqarneq ingerlanneqarsinnaanngippat, inuup innarluutillip aalajangiinissatut eqqarsaatigineqartumut isumaa allatut pissarsiariniarneqassaaq. Oqaloqateqarneq pisimanngippat, inuup iliuusissanut pilersaarutaani tamanna pissutaasorlu pillugit allattoqassaaq.

Illersuisoq

§ 24. Illersuisoqarnermik aaqqissuussineq kommunalbestyrelsimit pilersinneqassaaq siunertaralugu inuup innarluutillip illersuisumit tapersersorneqarnissaa:

- 1) Inatsisartut inatsisaat manna malillugu kommunalbestyrelsip tapersiinnissaq pillugu suliamik suliarinninnerani,
- 2) Inatsisartut inatsisaat manna malillugu kommunalbestyrelsip tapersiinnissaq pillugu aalajangiineranut naammagittaalliummik suliaqarnissami tunniussinissamilu, aamma
- 3) Inatsisartut inatsisaat manna malillugu tapersiinnissaq pillugu aalajangiinnermut tunngatillugu naammagittaalliummut suliamik Isumaginninnermi Naammagittaalliuuteqartarfiup suliarinninnerani.

Imm. 2. Toqqaasarneq, aningaasarsiaqartitsisarneq, pinerluuteqarsimannginnermut uppenarsaammik piniartarneq, kiisalu piukkunnassutsinut piginnaasaqarfinnullu piumasaqaatit suut illersortinut piumasaqaatigineqartassanersut pillugit maleruagassanik ersarinnerusunik Naalakkersuisut aalajangersaasinnaapput.

Qulaajaaneq

§ 25. Inuk kapitali 8-mi aalajangersakkat malillugit tapersersorneqarnissamik imaluunniit kapitali 9 aalajangersakkat malillugit inissatut neqeroorummi najugaqarnissamik pisariaqartitsisoq ilimagineqartariaqarpat, inummut innarluutilimmut tunngasunik qulaajaanermik kommunalbestyrelse suliaqassaaq. Taamaattoq qulaajaanissaq pisariaqanngitsoq ersarippat, qulaajaaneq ingerlanneqassanngilaq.

Imm. 2. Qulaajaaneq sapinngisamik tulliini taaneqartut suleqatigalugit ingerlanneqassaaq

- 1) inuk innarluuteqartoq,
- 2) nammineersinnaanngitsutut nakkutilliisitaligaasimappat,
- 3) angajoqqaatut sinniisooq, meeraasimappat tassunga angajoqqaatut akisussaasoq, kiisalu
- 4) isumassuisui allat.

Imm. 3. Qulaajaaneq, pissutsit pisinnaatippassuk, sapinngisamik qajassuussisumik ingerlanneqassaaq, aammalu siunertaasuni allassimasunit annertunerusinnaanani.

Imm. 4. Qulaajaanermut atatillugu kommunalbestyrelsip makkua nalilersussavai:

- 1) Timikkut tarnikkullu innarluuteqarnerup annertussusaa.
- 2) Imminut isumassorneq.
- 3) Pissusilersorneq, atugarissaarneeq ineriartornerlu.
- 4) Attaveqaatigiinneq.
- 5) Ilaqutariinnermut tunngasut.
- 6) Inooqatigiinnermut tunngasut aamma inoqatinut attaveqarneeq.
- 7) Peqqissutsimut tunngasut.
- 8) Suliffissaqartitsiniarneq aamma suliffeqarnissamut periarfissat.
- 9) Inuiaqatigiinni peqataaneq.
- 10) Inatsisartut inatsisaat manna malillugu imaluunniit inatsisit allat malillugit tapersersuineq inummut ikiorsiissutigineqareersoq.

Imm. 5. Tapersiinerup aallartinneqarnissaa tunngavissaqarnerooq pillugu kommunalbestyrelse qulaajaaneq tunuliaqutaralugu aalajangiissaaq.

Imm. 6. § 26 malillugu qulaajaaneq allaganngorlugu iliuusissanut pilersaarummik tunngavilersugaasumik inerneqassaaq.

Imm. 7. § 38, imm. 3 malillugu tapersiinissaq pillugu kommunalbestyrelse aalajangiigallarsimappat, tapersiineq aalajangiigallarneeq tunngavigalugu aallartinneqartoq ingerlatiinnarneqassanersoq imaluunniit unitsinneqassanersoq, qulaajaanerup naammassineranut atatillugu kommunalbestyrelse isummissaaq. Tassunga atatillugu inuk tassungalu angajoqqaatut sinniisooq imaluunniit angajoqqaatut akisussaasut tapersiinnermut isummernissaat eqqarsaatigineqassaaq.

Imm. 8. Imm. 1 malillugu suliani immikkut pisariussusilinni § 13, imm. 1, nr. 6 malillugu qulaajaaneq Inunnut innarluutilinnut Sullissivimmut Nunamut Tamarmut Atuuttumut kommunalbestyrelsip suliaqaqqusinnaavaa.

Imm. 9. Qulaajaanermut maleruagassanik erseqqinnerusunik Naalakkersuisut aalajangersaassapput.

Iliuusissanut pilersaarut

§ 26. Inunnut innarluutilinnut allaganngorlugu kommunalbestyrelsit iliuusissanut pilersaarutitik suliaqassapput ima pisoqartillugu:

- 1) § 25 malillugu qulaajaanermut atatillugu.
- 2) Kapitali 8 malillugu tapersorsorneqarnissap imaluunniit kapitali 9 malillugu inissatut neqeroorummi najugaqarnissap aallartinnissaa pillugu aalajangiisoqannginnerani.
- 3) Kapitali 14 malillugu tapersiinerup unitsinneqarnissaa pillugu aalajangiisoqannginnerani.
- 4) Meeqqap innarluutillip, Inatsisartut inatsisaat manna malillugu tapersiivigineqartup, meeqqat atuarfianni atuernerata naammassinissaa kingusinnerpaamik qaammatinik 12-inik sioqqullugu.
- 5) Meeqqap innarluutillip, Inatsisartut inatsisaat manna malillugu tapersiivigineqartup, 18-inik ukioqalernissaa kingusinnerpaamik qaammatinik 12-inik sioqqullugu.

Imm. 2. Iliuusissanut pilersaarut inummut innarluutilimmut tunngasuussaaq aammalu siiunertaasup allassimaneranit, annertunerusinnaanani.

Imm. 3. Iliuusissanut pilersaarummi tulliini taaneqartut allassimassapput:

- 1) Siunertaq aamma tapersiinermi anguniagaq.
- 2) Anguniagaq imaluunniit anguniakkat anguneqarnissaannut tapersiineq suna pisariaqarnersoq.
- 3) Tapersiinerup sivisussusissaatut naatsorsuutigineqartoq.
- 4) Tapersiinerup malinnaavigineqarnissaa, matumuuna malitseqartitsineq qaqugukkut pisassanersoq ilanngullugu.
- 5) Inatsisartut inatsisaat manna malillugu aamma inatsisit allat malillugit tapersiinerit allat ataqatigiinnerat.
- 6) Ilaquttat attaveqarfiillu, najugaqariaaseq, ilinniartitaaneq, suliffeqarneq, inuttut ikiorteqarneq, katsorsartinneq aamma atortorissaarutit ikiuutaasussat il.il. pillugit pissutsit immikkut ittut allat.

Imm. 4. Iliuusissanut pilersaarut sapinngisamik inuk innarluutilik tassungalu angajoqqaatut akisussaasut imaluunniit angajoqqaatut sinniisoqarpat sinniisui aamma allat isumassuisui oqaloqatigalugit suleqatigalugillu suliarineqassaaq.

Imm. 5. Kapitali 9 malillugu najugaqarfissatut neqeroorummiinnermi iliuusissatut pilersaarutit ilai attuumassuteqartut najugaqarfissatut neqeroorummut tunniunneqarnissaat kommunalbestyrelsip isumagissavaa.

Imm. 6. Iliuusissatut pilersaarut inummut innarluutilimmut tassungalu angajoqqaatut sinniisoqarsimaguni sinniisui imaluunniit angajoqqaatut akisussaasunut tunniunneqassaaq, aammalu kommunalbestyrelse tunniussinnermut atatillugu taassuma imarisai pillugit ilisimatitsissaaq.

Imm. 7. Iliuusissanut pilersaarutip ilusaa imarisaalu kiisalu sulianik ingerlatitsinermut aamma iliuusissanut pilersaarutip naammassineqarnissaanut piffissatigut piumasaqaatit pillugit maleruagassanik erseqqinnerusunik Naalakkersuisut aalajangersaassapput.

Ineriartortitsinissamut pilersaarut

§ 27. § 26 malillugu ulloq unnuarlu neqeroorut inummut innarluutilimmut iliuusissanut pilersaarut aallaavigalugu ineriartortitsinissamut pilersaarummik ukiumut minnerpaamik ataasiarluni suliaqartassaaq. Ineriartortitsinissamut pilersaarummi, iliuusissanut pilersaarummi siunertaasut aamma ulloq unnuarlu neqeroorummiititsinermut anguniakkat aallaavigalugit, perorsaanikkut suliaqarneq, iliuusissanut pilersaarummi anguniakkat anguneqarnissaannik qulakkeeriviusussat, nassuiarneqassapput.

Imm. 2. Inunnut ulloq unnuarlu neqeroorummiittunut ineriartortitsinermut pilersaarutip ilusaa imarisaalu pillugit maleruagassanik erseqqinnerusunik Naalakkersuisut aalajangersaassapput.

Killiffinnut nalunaarusiaq

§ 28. Kommunalbestyrelsip § 60, imm. 1 malillugu inummut tunngasumik nakkutilliinermi atugassaanik, inuup innarluutillip atugarissaarnera ineriartorneralu, § 26 malillugu iliuusissatut pilersaarummut, aamma § 27 malillugu ineriartornissamut pilersaarummut naleqqiullugit, killiffinnut nalunaarusiatut ilusilimmik, ulloq unnuarlu neqeroorutip kommunalbestyrelse ilisimatissavaa. Inuup peqqissusaanut tunngasuni imaluunniit inooqataanerani tunngasuni annertuumik allanngortoqarpat imaluunniit allanngortoqassasoq naatsorsuutigineqarpat, ulloq unnuarlu neqeroorutip piaartumik kommunalbestyrelse nalunaarfigissavaa.

Imm. 2. Killiffinnut nalunaarusiat ulloq unnuarlu neqeroorummiinnerup aallartinnerata kingorna kingusinnerpaamik qaammatit pingasut qaangiunneranni kommunalbestyrelsinut nassiunneqartassapput. Tamatuma kingorna killiffinnut nalunaarusiat ima nassiunneqartassallutik:

- 1) inuit innarluutillit 18-it inorlugit ukiullit pillugit ukioq affakkaarlugu 1-eriarluni aamma
- 2) inuit innarluutillit 18-it sinnerlugit ukiullit pillugit ukioq 1-ikkaallugu.

Imm. 3. Inunnut innarluutilinnut ulloq unnuarlu neqeroorummiittunut killiffinnut nalunaarusiap ilusaa imarisaalu pillugit maleruagassanik erseqqinnerusunik Naalakkersuisut aalajangersaassapput.

Nalunaarutiginnittussaataaneq aamma utertillugit akiliisussaataaneq

§ 29. Inuk innarluutilik, Inatsisartut inatsisaat manna malillugu tapersiivigineqarnissamik qinnuteqartoq, kommunalbestyrelsip piumaffigisinnaavaa:

1) paasissutissanik inuup qanoq tapersiivigineqarnissamut pisinnaatitaaneramik kommunalbestyrelsip aalajangiisinaanissaanut pisariaqartunik pissarsiniarnermi peqataassasoq, aamma

2) § 25 malillugu qulaajaanermut ilaatillugu nakorsamit misissortissasoq imaluunniit malinnaavigineqarnissamut katsorsartinnissamullu napparsimavimmut unitsinneqassasoq.

Imm. 2. Inuup innarluutillip tassungalu angajoqqaatut sinniisoqarsimaguni sinniisup imaluunniit angajoqqaatut akisussaasut akuersineratigut, oqartussanit allanit inummut tunngasunik ilisimasaqartunit imaluunniit inummik innarluutilimmik ilisarimannittunit paasissutissanik, Inatsisartut inatsisaat manna malillugu tapersiivigineqarnissaq pillugu qinnuteqaatip suliarineqarsinnaanissaanut pisariaqartutut isigineqartariaqartunik, kommunalbestyrelse piniarsinnaavoq. Inuk innarluutilik paasissutissiiviusumik akuersisinnaanngippat, inuullu innarluutillip soqutigisaasa isumaginissaannut tamanna pingaaruteqartutut isigineqartariaqarpat, taamaakkaluartoq kommunalbestyrelse paasissutissanik piniarsinnaavoq, taamaattoq takuuk imm. 3.

Imm. 3. Inuk innarluutilik kingunissaasinnaasut pillugit ilisimatinneqareerluni akuersissummik tunniussisinnaanngippat, aamma taassuma angajoqqaatut sinniisoqarsimaguni sinniisuanit imaluunniit angajoqqaatut akisussaasunit akuersissut pineqarsinnaasimannngippat, kommunalbestyrelsip paasissutissat inummut tunngasut pissarsiariniarsinnaavai, tamanna inuup soqutigisaasa nakkutigineqarnissaannut pingaaruteqarpat.

§ 30. Inuk innarluutilik Inatsisartut inatsisaat manna malillugu tapersiivigineqartoq, tassungalu angajoqqaatut sinniisoqarsimaguni sinniisua imaluunniit angajoqqaatut akisussaasui, inummut innarluutilimmut tunngasuni allannguutit tamaasa, tapersiinerup tamakkiisumik ilaannaasumilluunniit allanngortinneqartariaqarnerannik imaluunniit unitsinneqarnissaannik malitseqarsinnaasut, pillugit kommunalbestyrelsip ilisimatinnissaanik pisussaaffeqarpat.

Imm. 2. Inuup imm. 1-imi paasissutissiisussaataaneq taaneqartoq naammassinngippagu imaluunniit ilisimareeraluarlugu Inatsisartut inatsisaat manna malillugu tapersiissutitik pisinnaatitaananit tigusaqarsimappat, kommunalbestyrelsip tiguneqarsimasut utertillugit akilerneqassasut imaluunniit utertillugit tunniunneqassasut piumasarisinnaavaa.

Imm. 3. Imm. 2 malillugu tapersiissutip pisussaananit ikiorsiissutigineqartup utertillugu akilernissaa imaluunniit utertillugu tunniunnissaa pillugu Naalakkersuisut maleruagassanik aalajangersaasinnaapput, matumani utertillugit akiliinissamut piffissatigut maleruagassat, ernialersuineq il.il. ilanngullugit.

Suliani aalajangersimasuni paasissutissanik paarlaasseqatigiittarneq

§ 31. Ineqarnissamut neqeroorutip, kommunalbestyrelsip, ilinniarfeqarfiit peqqinnissaqarfiullu suliani ataasiakkaani suleqatigiinnermut ilaatillugu, paasissutissat suliap

suliarineqarneranut pingaaruteqarpata, inummut paasissutissat politiinut ingerlateqqissinnaavaat, matumani paasissutissat inummut tunngasut mianernartut ilanngullugit. Inuk suliame pineqartoq, imaluunniit taassuma angajoqqaatut sinnisua imaluunniit angajoqqaatut akisussaasui akuersiteqqaarlugu paasissutissanik ingerlatitseqqittoqarsinnaavoq, taamaattoq takuuk imm. 2.

Imm. 2. Imm. 2 malillugu akuersissut tunniunneqarumangippat, imaluunniit allanik pissuteqartumik akuersissummik piniartoqarsinnaangippat, kommunalbestyrelsip paasissutissat inummut tunngasut ingerlateqqissinnaavai, matumani paasissutissat inunntut tunngasut mianerilluinnartariaqartut ilanngullugit, suliame pissutsit, matumani inuup inatsisitigut isumannaatsuunissaata eqqarsaatigineqarnera ilanngullugu, erseqqissumik pisariaqartippassuk. Ingerlatitseqqinnermut piumasqaataavoq inuup soqutigisaanik nakkutiginninnissaq, taamaaliornerullu isertuussiinnarnissamik peqquteqarnissamut soqutigisat ersarissumik qaangersimassagai, matumani inuup pineqartup, paasissutissat tunngaviata, mianerinninneqarnissaata eqqarsaatigineqarnissaa ilanngullugu.

Kapitali 5

Nalunaarutiginnittarneq

Nalunaarutiginnittussaatitaaneq nalinginnaasoq

§ 32. Inuup innarluutillip atugarissaarneranut, peqqissusaanut imaluunniit ineriartorneranut navianartorsiortitsisumik atugaqartinneqartoq, innuttaasup paasiguniuk, innuttaasup kialluunniit kommunalbestyrelsimut nalunaaruteqarnissani pisussaaffigaa.

Imm. 2. Kommunalbestyrelsip nalunaarutiginninnerup tiganerata kingorna sapaatip akunnerata ataatsip qaangiutinnginnerani, nalunaarutiginninneq tiganerartoq innuttaasumut allaganngorlugu uppersarsaalluni nassiuutissavaa.

Sakkortusisamik nalunaarutiginnittussaatitaaneq

§ 33. Isumaginnittoqarfinni, peqqinnissaqarfinni ilinniartoqarfinnilu sulisut, inuk innarluutilik tapersiivigineqarnissamik pisariaqartitsisoq, inuussutissarsiuutigalugu sulinerminnut atatillugu sulisup paasiguniuk imaluunniit ilimaginissaanut pissutissaqaruni, ingerlaannaq kommunalbestyrelsimut nalunaaruteqarnissamik sukannererusumik pisussaaffeqarput. Nalunaarutiginnittussaatitaaneq taanna, innuttaasunit tamanit qinerneqarlutik suliaqartunut imaluunniit inuiaqatigiinni sullissillutik suliaqartunut, atuuppoq.

Imm. 2. Nalunaarutiginninnerup tiganerata kingorna sapaatip akunnera ataaseq qaangiutsinnagu sulisumut nalunaarutiginnittumut, nalunaarutiginninneq tiganerartoq allaganngorlugu uppersarsarlugu kommunalbestyrelsip nassiuutissavaa.

Kommunit akunnerminni nalunaarutiginnittussaatitaanerat

§ 34. Kommunalbestyrelsip kommune nuuffigineqartoq allaganngorlugu nalunaarfigissavaa:

- 1) § 41 malillugu inuk innarluutilik nammineq angerlarsimaffimmini ulluinnarni isumassorneqartoq, kommunimut allamut nuuppat, aamma inuk innarluutilik Inatsisartut inatsisaat manna malillugu suli tapersiivigineqarnissamik pisariaqartitsisoq kommunalbestyrelse isumaqarpat.
- 2) kapitali 9 malillugu inuk innarluutilik najugaqarfissatut neqeroorummut inissinneqartoq, nammineq piumassutsini malillugu kommunimut allamut nuuppat, aamma
- 3) inuk innarluutilik nammineq piumasani malillugu kommuninut allamut nuuppat, aamma kapitali 8 malillugu tapersiissutinik pisariaqartunik inuttaa pinngikkuni inuup atugarissaarnera navianartorsiortinneqassasoq nalilerneqarpat.

Imm. 2. Imm. 1 malillugu nalunaarutiginninnermut atatillugu kommunip qimanneqartup suliassami najoqqutassat attuumassuteqartut nassiutissavai, matumani paasissutissat attuumassuteqartut eqikkarneqarnerat, tapersiivigineqarnissamik pisariaqartitsinermik naliliinnermut kommunip qimanneqartup tunngavigisimasai, ilanngullugit.

Imm. 3. Ilaqutariit inummik innarluutilimmik ilaqartut Kalaallit Nunaata avataanut nuuppata, kommunimut nunani allaniittumut imaluunniit oqartussamut taamaaqataanut allamut tunngatillugu imm. 1-2 taamaaqataanik atuupput.

Nuna tamakkerlugu nalunaarutiginninnermi periaaseq

§ 35. Naalackersuisut §§ 32-34 malillugit nalunaarutiginninnerit, nalunaarutiginninnernut ataatsimoortumik takussutissiinissamik siunertaqartut pillugit, nuna tamakkerlugu nalunaarutiginninnermi periaatsimik ingerlatsissapput.

Imm. 2. Nuna tamakkerlugu nalunaarutiginninnermi periaaseq pillugu maleruagassanik erseqqinnersunik Naalackersuisut aalajangersaasinnaapput, matumani ingerlatsineq, paasissutissanik nalunaarsukkanik isumaginninneq aamma paasissutissanik katersineq ilanngullugit.

Kommunip nalunaarutiginnittoqarnerani iliuuseqartussaataitanera

§ 36. §§ 32, 33 aamma 34 malillugit kommunalbestyrelsip nalunaarutiginninneq tiguguniuk, piaarnerpaamik, taamaattoq ullut suliffiusut 5-it iluanni, § 55 malillugu qulaajaanermik aallartitsinissamik tunngavissaqarnerasoq pillugu aalajangiisaaq.

Imm. 2. Imm. 1 malillugu qulaajaaneq aallartinneqassasoq kommunalbestyrelse aalajangiippat, qulaajaaneq piaartumik aammalu kingusinnerpaamik nalunaarutiginninnerup tiguneqarnerata kingorna sapaatit akunneri marluk qaangiutsinnagit, aallartinneqassaaq.

Imm. 3. Inummik innarluutilimmik, persuttaasoqarsimaneranik imaluunniit kinguaassiutitigut atornerluisoqarneranik nalunaarutiginninnerup, kommunalbestyrelsimut paarsinerluttoqarneranik pasitsaassititsisup, tiguneqarnerani, taamaattoq

nalunaarutiginninnerup tiguneqarnerata kingorna kingusinnerpaamik ullut suliffiusut 3-it iluanni, § 25, imm. 1 malillugu qulaajaaneq aammalu § 38, imm. 4 malillugu tapersiisoqassappallu tapersiissuteqarallarneq ingerlaannaq aallartinneqassapput.

Imm. 4. Imm. 3 malillugu nalunaarutiginninnerup tiguneqarnerani, kommunalbestyrelsip nalunaarutiginninneq tiguneqartoq pillugu politiit ingerlaannaq nalunaarfigissavai.

Imm. 5. Kommunalbestyrelsip iluuseqartussaataaana, kommunalbestyrelsip nammineq ingerlataminik, inuup innarluutillip atugai aarlerinartoqartut paasigunigit, matuma siuliani imm. 1-4 taamaaqataanik atuupput.

Kapitali 6

Siunnersuisarneq ilitsersuisarnerlu

§ 37. Inunnut innarluutilinnut aammalu inunnut innarluutilinnut ilaqutaasunut kommunalbestyrelse siunnersuisassaaq.

Imm. 2. Imm. 1 malillugu siunnersuineq Inatsisartut inatsisaat manna imaluunniit inatsisit allat malillugit tapersiissuteqarnermut atatillugu immikkut ittumik pisinnaavoq.

Imm. 3. Inuup innarluutillip aammalu inummut innarluutilimmut ilaqutaasut siunnersorneqartarnerat ilitsersorneqartarnerallu pillugit maleruagassanik erseqqinnerusunik Naalakkersuisut aalajangersaassapput, matumani atortunik ikiuutaasussanik toqqaanermi siunnersuineq aammalu taakkua atornissaannut ilitsersuineq ilanngullugit.

Kapitali 7

Aalajangiisinnaatitaaneq

Tapersiisarneq

§ 38. Kapitali 8-imi aalajangersakkat malillugit tapersersorneqarnissamik imaluunniit kapitali 9-imi aalajangersakkat malillugit inissatut neqeroorummi najugaqarnissamik kommunalbestyrelse inummut innarluutilimmut tapersiinissaq pillugu aalajangiissaaq.

Imm. 2. Imm. 1 malillugu aalajangiineq inuup ataatsip pisariaqartitsineranik pisinnaasaqarnerinillu aalajangersimasumik ataasiakkaatigullu nalilersuineq tunngavigalugu pissaaq. Inuk piginnaanikillismanersoq kommunalbestyrelsip nalilersuinermini paasinarsisissavaa.

Imm. 3. § 23 malillugu tapersiinissamik aalajangiisoqartinnagu, inuk innarluutilik taassumalu angajoqqaatut sinniisoqarsimaguni sinniisaa imaluunniit angajoqqaatut akisussaasui, kommunalbestyrelsip oqaloqatigereersimassavai.

Imm. 4. Nukinginnartumik tapersiivigineqarnissamik pisariaqartitsisoqartillugu, § 25 malillugu qulaajaanermik suliaqartoqarsimanngikkaluartoq aammalu § 26 malillugu iliuusissanut pilersaarummik suliaqartoqarsimanngikkaluartoq, imaluunniit taakkua

naammassineqarsimannikkaluartut, kommunalbestyrelse immikkut ittumik tapersiinissaq pillugu aalajangiissaaq, aammalu immikkut ittumik tapersiineq aallartissallugu. Tamatuma kingorna sapinngisamik piaarnerpaamik § 25 malillugu qulaajaaneq, aamma § 26 malillugu iliussissanut pilersaarut kommunalbestyrelsip suliarissavaa naammassissallugulu, aammalu taanna tunngavigalugu pisariaqarpat nutaamik aalajangiissalluni.

Ingerlaavartumik malitseqartitsineq

§ 39. Kommunalbestyrelsimit tapersiinissaq imaluunniit najugaqarfissatut neqeroorummi najugaqarnissaq pillugu aalajangiisoqareerpat, tapersiinermi siunertaasoq naammassineqarsinnaanersoq ingerlaavartumik malinnaaffigissavaa. Malinnaaneq sapinngisamik inuk innarluutilik suleqatigalugu pissaq.

Imm. 2. Ingerlaavartumik malittarinneq pillugu maleruagassanik erseqqinnerusunik Naalakkersuisut aalajangersaasinnaapput.

Ilusiliussassanut piunasaqaatit

§ 40. Tapersiinissaq imaluunniit najugaqarfissatut neqeroorummi najugaqarnissaq pillugu aalajangiineq tunngavilersuutitaqartinneqassaaq, tapersiinermi tunngaviusut siunertaasorlu nassuiarneqarlutik, kiisalu naammagittaalliornissamik ilitersuutitaqartinneqarsinnaalluni.

Kapitali 8

Tapersiinissamut periarfissat

Nammineq angerlarsimaffimmi isumassuinerup isumaginissaanut tapersiisarneq

§ 41. Inummut, inuup innarluutillip nammineq angerlarsimaffimmini najugaqartup ulluinnarnik isumassorneqarneranik isumaginnittumut, inuttullu tapersorneqarnissamik isumassorneqarnissamillu aningaasaliiffigineqarsimasumut, kommunalbestyrelse aningaasatigut tapiissuteqartassaaq.

Imm. 2. Imm. 1 malillugu tapersiineq, kommunalbestyrelsip inuummik isumassuisumik atorfinitsitsineratigut pissaq. Inuup innarluutillip pisariaqartitsinera tunngavigalugu sapaatip akunneranut nalunaaquttap akunnerisa atorfinitsitsiviusussat amerlassusissai, kommunalbestyrelsip aalajangersassavai.

Imm. 3. Imm. 2 malillugu akissarsiassaq, siusinnerusukkut ilanngaasiinnginnermi isertitarisimasat tunngavigalugit aalajangersarneqassaaq. Akissarsiat piffissaq tamakkerlugu atorfinitsinneqarnermut naleqqiullugu, nalunaaquttap akunnerinut innersuussivigineqartunut annikillisinneqassapput. Ukiunut siuliinut isertitarisimasanut uppenarsaatissaqanngippat, akissarsiaritineqartut aallaaviatigut SIK-mut isumaqatigiissut malillugu ilinniarsimannngitsup akissarsiaanut minnerpaamut qaqugukkulluunniit atuuttumut aalajangerneqassapput.

Imm. 4. Inunnik inoqutigiinni ilaangitsunik atorfinitsitsisoqartussaattillugu pineqaatissinneqarsimanginnermut uppernarsaat aammalu naleqqutsillugu meeqqanik pinerliisimanginnermut uppernarsaat piniarneqassapput.

Imm. 5. Aningaasarsianut atugassarititaasut naatsorsorneqartarnerannut naleqqussarneqartarnerannullu maleruagassanik erseqqinnerusunik Naalakkersuisut aalajangersaassapput, matumani aningaasarsiat qaffasinnerpaaffissaat atorfinitsitaanermilu atugassarititaasut ilanngullugit.

Oqilisaassineq

§ 42. Ulluinnarni isumassuineq angajoqqaanit imaluunniit ilaqtanit allanit nammineq angerlarsimaffimmi imaluunniit angajoqqaarsianit isumagineqarpat, kommunalbestyrelse inummut innarluutilimmut oqilisaassinissamik neqerooruteqassaaq.

Imm. 2. Imm. 1 malillugu oqilisaassineq aatsaat neqeroorutigineqarsinnaavoq:

- 1) isumassuinermi suliaasaq, angajoqqaanut imaluunniit ilaqutaasunut allanut isumassuinermik isumaginnittunut annertuumik suliaqarnerunermik malitseqartarpat, aamma
- 2) angajoqqaat, ilaqutaasut allat ilaqtariilluunniit paarsisartut isumassuinermik isumaginniinnarsinnaanissaannut oqilisaassinissaq pisariaqarpat.

Imm. 3. Imm. 1 aamma 2 malillugit oqilisaassineq §§ 47-50 naapertorlugit inissatut neqeroorummiititsinikkut pisinnaavoq. Meeqqanut aamma meeqqat tapersorsorneqarnissaannut Inatsisartut inatsisaanni § 37 malillugu kommunip aaqqissugaanik ilaqtariinni paarsisartuni oqilisaassineq pisinnaavoq.

Imm. 4. Inuup innarluutillip ulluinnarni isumassorneqarnera angajoqqaanit imaluunniit ilaqtanit allanit nammineq angerlarsimaffimmi imaluunniit ilaqtariinnit paarsisartunit isumagineqarpat, oqilisaassineq pillugu maleruagassanik erseqqinnerusunik Naalakkersuisut aalajangersaasinnaapput.

Inuk tapersersortasartuq

§ 43. Inummut innarluutilimmut, pingaarutilimmik timikkut tarnikkulluunniit piginnaanikillimasumut, nammineq angerlarsimaffimmini nammineersinnaanissamut isumaginninikkut perorsaasumit tapersorsorneqarnissamik pisariaqartitsisumut, inummik tapersersortasussamik kommunalbestyrelse neqerooruteqassaaq.

Imm. 2. Inuk innarluutilik, taassuma tarnikkut, timikkut inooqatigiinnikkullu ineriartorneranut kiisalu ulluinnarni suliaaminik suliaqarnissaanut inuup tapersersortasup ikiortassavaa.

Imm. 3. Imm. 1 malillugu aalajangiinnermut ilaatillugu sapaatip akunneranut nalunaaquttap akunnerisa tapersersuinnermut atorneqartussat amerlassusissaat kommunalbestyrelsip aalajangersassavai.

Imm. 4. Inuk tapersersortasooq kommunalbestyrelsimit atorfinitsinneqartassaaq.

Imm. 5. Inuit tapersersortaausut pillugit maleruagassanik erseqqinnerusunik Naalakkersuisut aalajangersaasinnaapput, matumani ilanngullugit:

- 1) piukkunnassutsinut piginnaasaqarfinnullu piumasaqaatit, kiisalu
- 2) meeqqanik pinerliisimannnginnermut uppersarsaammik aamma pineqaatissinneqarsimannnginnermut uppersarsaatiniq piniartarneq.

Nuunnissamut ikiorsiissutit

§ 44. Meeqqamut innarluutilimmut angajoqqaatut akisussaasuusunut, kommunip iluani najukkap nuuneqarnerani aningaasartuutiniq matussutissanik, kommunalbestyrelse aningaasanik tapersiinnissamik neqerooruteqarsinnaavoq, pisuni makkunani:

- 1) angajoqqaatut akisussaasut maannakkut najugaanni meeqqap tapersersorneqarnissamut isumassorneqarnissamullu pisariaqartitai naammassineqarsinnaanngippata imaluunniit ajornakusooruteqarluni aatsaat naammassineqarsinnaappata,
- 2) Inatsisartut inatsisaat manna malillugu tapersersorneqarnissamut meeqqap pisariaqartitai, siunissami najugariligassatut kissaatigineqartumi pitsaanerusemik naammassineqarsinnaappata, aamma
- 3) angajoqqaatut akisussaasut nammineerlutik nuunnissaq kissaatigalugu erseqqissumik oqaatigippassuk.

Imm. 2. Meeqqamut innarluutilimmut angajoqqaatut akisussaasut nuunnermini aningaasartuutaannut matussutissanik kommunalbestyrelse aammattaq aningaasanik tapiissuteqarsinnaavoq, tassani ulloq unnuarlu neqeroorummi inissiinissaq aalajangerneqarpat, angajoqqaatullu akisussaasut illoqarfimmut ulloq unnuarlu neqeroorutip inissisimaffigisaani najugaqarnissaat meeqqamut pitsaanerpaajussasoq nalilerneqarpat. Piumasaqaatit imm. 1, nr. 1-3-miittut eqqortinneqartussaapput.

Inunnut Innarluutilinnut Sullissivimmi Nunamut Tamarmut Atuuttumi allanngutsaaliuilluni sungiusaasarneq

§ 45. Inuup piginnaaneqarnerminik attassiinnarnissaanut tamanna annertuumik pingaaruteqartoq isumaqartoqarpat, Inunnut Innarluutilinnut Sullissivimmi Nunamut Tamarmut Atuuttumi inuup innarluutillip allanngutsaaliuilluni sungiusarnissaanik neqerooruteqarnissaq pillugu kommunalbestyrelse aalajangiisinnaavoq, matumani piffissami killilimmi najugaqarnissaq ilanngullugu.

Imm. 2. Imm. 1 malillugu aatsaat kommunalbestyrelse aalajangiisinnaavoq, Inunnut Innarluutilinnut Sullissivimmi Nunamut Tamarmut Atuuttumiinnissamut akuersissut pigineqarpat. Inunnut Innarluutilinnut Sullissivimmi Nunamut Tamarmut Atuuttoq

kommunalbestyrelsimit inassuteqaat tunngavigalugu akuersissuteqarnissaq pillugu aalajangiissaaq.

Imm. 3. Inunnut Innarluutilinnut Sullissivimmi Nunamut Tamarmut Atuuttumiinermut atuinermullu Naalakkersuisut akigititanik aalajangersaasinnaapput tamanullu saqqummiussisinnaallutik.

§ 46. Kommunalbestyrelsit tapersersuineri iliuusissat suut tunniussinnaaneraat pillugit maleruagassanik erseqqinnerusunik Naalakkersuisut aalajangersaassapput, matumani ilanngullugit:

- 1) inuttut ikiorteqarnek isummersorneqarnerlu,
- 2) atortorissaarutit ikiuutaasut,
- 3) ingiaqateqartarnek
- 4) inigisap aaqqissugaanera
- 5) qamutit motorillit
- 6) ataatsimoortunik angallassinermik aaqqissuussineq
- 7) aningaasartuutaanerusut
- 8) Suliffissaqartitsinermut, sammisassaqartitsinermut katerisimaaqateqarnissamut neqeroorutit
- 9) pikkorissarneqarnerit ilinniartinneqarnerillu

Kapitali 9

Najugaqarfissatut neqeroorutit

Najugaqaqatigiiffiit

§ 47. Inummut innarluutilimmut inuiaqatigiinnut qanittumiittumi najugaqaqatigiiffimmi najugaqarnissamik kommunalbestyrelse neqerooruteqassaaq, ima pisoqartillugu:

- 1) inuk 18-it sinnerlugit ukioqarpat,
- 2) inuup pingaarutilimmik timikkut tarnikkulluunniit piginnaanikillismanini pissutigalugu ulluinnarni tapersersorneqarnissaq pisariaqartippagu,
- 3) inuk pingaarutilimmik timikkut tarnikkulluunniit piginnaanikillismanini pissutigalugu nammineq angerlarsimaffimmini najugaqarsinnaanngippat,
- 4) inuk nammineersinnaappat, perorsaannikkut suliassatigullu ikiorneqarnissaq taamaallaat ulluunerani nalunaaquttap akunnerini pisariaqarluni, aamma
- 5) inuup pisariaqartitai najugaqaqatigiiffimmi najugaqarnerani naammassineqarsinnaappata.

Imm. 2. Imm. 1 malillugu inuup tapersersorneqarnissamik pisariaqartitsinera nunaqqataasunut qanittumi najugaqaqatigiiffimmiinnermi naammassineqarsinnaanngippat, inuk innarluutilik najugaqaqatigiiffimmi, kommunimi allami inissisimasumi

najugaqarnissamik kommunalbestyrelsip neqeroorfigisinnaavaa. Imm. 1, nr. 1-5-imi piumasqaatit naammassineqarsimassapput.

Imm. 3. Imm. 2 malillugu najugaqaqatigiiffimmi kommunimi allami inissisimasumi inuup inissamik neqeroorfigineqarnissaanut piumasqaataavoq:

- 1) inuk imaluunniit taassuma angajoqqaatut sinniisua akuersisimassasoq, aamma
- 2) inissap neqeroorutigineqarnissaa sioqqullugu, inuup kommunip angerlarsimaffiani kommunalbestyrelsip aamma kommunimi najugaqaqatigiiffiup aalajangersimasup taassuma inissisimaffigisaani kommunalbestyrelsip akornanni isumaqatigiissuteqartoqarsimassasoq.

Najugaqarfik illersugaasooq

§ 48. Inummut innarluutilimmut inuiaqatigiinnut qanittumiittumi najugaqarfimmi illersugaasumi najugaqarnissamik kommunalbestyrelse neqerooruteqassaaq, ima pisoqartillugu

- 1) inuk 18-it sinnerlugit ukioqarpat,
- 2) inuk pingaarutilimmik timikkut tarnikkulluunniit piginnaanikillisimanini pissutigalugu ulluinnarni tapersorneqarnissaq pisariaqartippagu,
- 3) inuk pingaarutilimmik timikkut tarnikkulluunniit piginnaanikillisimanini pissutigalugu nammineq angerlarsimaffimmini najugaqarsinnaanngippat,
- 4) inuk najugaqaqatigiiffimmi neqeroorutigineqarsinnaasut saniatigut, tapersorneqarnissamik pisariaqartitsippat, ilanngullugu ulloq unnuarlu tamaat tapersorneqarnissamik pisariaqartitsineq, aamma
- 5) inuup pisariaqartitai najugaqarfimmi illersugaasumi najugaqarnermi naammassineqarsinnaappata.

Imm. 2. Inuup tapersorneqarnissamik pisariaqartitsinera imm. 1 malillugu nunaqqataasunut qanittumi najugaqaqatigiiffimmiinnermi naammassineqarsinnaanngippat, inuup najugaqarfimmi illersugaasumi najugaqarnissaanik neqerooruteqarnissamik aalajangiisoqannginnerani, § 23 malillugu inuk innarluutilik taassumani angajoqqaatut sinniisoqarsimaguni sinniisaa kommunalbestyrelsip oqaloqatigisimassavai.

Imm. 3. Inuup innarluutillip kommunimi allami najugaqarfimmi illersugaasumi najugaqarnissaa kommunalbestyrelsip neqeroorutigisinnaavaa, tamanna imm. 1 malillugu nunaqqataasunut qanittumi inuup innarluutillip najugaqarfimmik illersugaasumik pisariaqartitsineranut tapersiinissaq naammassineqarsinnaanngippat. Imm. 1-imi nr. 1-5-imut piumasqaatit sulii naammassineqarsimassapput.

Imm. 4. Imm. 3 malillugu inuup kommunimi allami najugaqarfimmi illersugaasumi inissinneqarnissaanut neqeroorfigineqarnissaanut piumasqaataapput:

- 1) inuup imaluunniit taassuma angajoqqaatut sinniisaata akuersisimanissaa, aamma
- 2) inuup kommunimi angerlarsimaffiani kommunalbestyrelsip, kommunimilu najugaqarfiup illersugaasup inissisimaffigisaani kommunalbestyrelsip, inissap neqeroorutigineqannginnerani isumaqatigiissimanissaat.

Inunnut innarluutilinnut ulloq unnuarlu neqeroorummi inissiineq

§ 49. Inummut innarluutilimmut, ulloq unnuarlu neqeroorummiinnissamut kommunalbestyrelse neqerooruteqassaaq inuk pingaarutilimmik timikkut tarnikkulluunniit piginnaanikillissimanini pissutigalugu ulluinnarni annertuumik imaluunniit immikkuullarissumik tapersorsorneqarnissamik pisariaqartitsippat imaluunniit paaqqtarineqarnissamik, isumassorneqarnissamik katsorsarneqarnissamilluunniit pisariaqartitsippat, pisariaqartinneqartullu taakku allatigut naammassineqarsinnaanngippata.

Imm. 2. Imm. 1 malillugu inuk ulloq unnuarlu neqeroorummiittoq pisortanit pilersorneqarnissamut ikiorsiissutinik tigusaqartanngikkuni, aningaasanik kaasarfimmiussanik atisassarsiutissanillu pisinnaatitaavoq.

Imm.3. Aningaasat kaasarfimmiussat atisassarsiutissallu pillugit maleruagassanik ersarinnerusunik Naalakkersuisut aalajangersaassapput.

Kalaallit Nunaata avataani najugaqarfissatut neqeroorummi inissiineq

§ 50. Inuup innarluutillip § 47 malillugu najugaqaratigiiffinni inissinneqarnissaanik, § 48 malillugu najugaqarfimmi illersugaasumi inissinneqarnissaanik, imaluunniit § 49 malillugu Kalaallit Nunaanni najugaqarfissatut neqeroorummi inissinneqarnissaanik kommunalbestyrelse qulakkeerinnissaaq, taamaattoq takuuk imm. 2.

Imm. 2. Inuup pisariaqartitai Kalaallit Nunaanni naammassineqarsinnaanngippata, Kalaallit Nunaannilu naleqquttumik tapersiinnissaaq periarfissaqanngilluinnarpat, Naalakkersuisut akuersiteqqaarlugit qaqutiguinnaq Kalaallit Nunaata avataani najugaqarfissatut neqeroorummiinnissamik neqerooruteqartoqarsinnaavoq.

Imm. 3. Kalaallit Nunaata avataani najugaqarfissatut neqeroorummiittarneq pillugu maleruagassanik erseqqinnerusunik Naalakkersuisut aalajangersaasinnaapput.

§ 51. Inuk innarluutiminut piginnaanngorsarnissamik pisariaqartitsippat imaluunniit piginnaanngorsaaqqinnermik suliniuteqarfigineqarnissamik pisariaqartitsippat, aammalu pisariaqartitsineq Kalaallit Nunaanni naammassineqarsinnaanngippat, inuk innarluutilik ulloq unnuarlu neqeroorummi inissikkallarnissaanik, efterskolemiinnissamik imaluunniit Kalaallit Nunaata avataani assingusumi neqeroorummi isissikkallarnissaanik, kommunalbestyrelse neqerooruteqarsinnaavoq.

Imm. 2. Kalaallit Nunaata avataani inissinneqarallarnissaaq pillugu maleruagassanik erseqqinnerusunik Naalakkersuisut aalajangersaasinnaapput, matumani inissinneqarallarnerup sivilisussusissaa ilanngullugu.

Kapitali 10

Inunnik innarluutilinnik ulloq unnuarlu neqeroorummi matoqqasumi inissiisarneq

§ 52. Ulloq unnuarlu neqeroorummi isumannaallisakkami, inunnik innarluutilinnik inissiisoqarsinnaavoq, ima pisoqarnerani:

- 1) Inuup innarluutillip angerlarsimaffimmi tulluurtumi imaluunniit paaqqinniffimmi tigusaqqanerata attatiinnarneqarnissaa pillugu Kalaallit Nunaanni eqqartuussisarnermik inatsimmi § 358, aamma § 361, imm. 2, nr. 3 naapertorlugit Eqqartuussivik aalajangiisimappat.
- 2) Kalaallit Nunaanni eqqartuussisarnermik inatsimmi § 359, aamma § 361, imm. 2, nr. 3 naapertorlugit inuup innarluutillip angerlarsimaffimmi tulluurtumi imaluunniit paaqqinniffimmi tigummigallarneqarnissaa pillugu eqqartuussivik aalajangiisimappat.
- 3) Kalaallit Nunaannut Pinerluttulerinermut inatsimmi kapitali 32 imaluunniit 33 malillugit pineqaatissiinissaq pillugu eqqartuussivik aalajangiisimappat.

Imm. 2. Kommunimi inuup innarluutillip tigusarinearnermini aamma tigummigallarneqarnerani najugaqarfigisaani kommunalbestyrelse, pisuni imm. 1, nr. 1-imi pineqartunut ilaasuni, sapinngisamik piaarnerpaamik, politiinit isumannaallisaanikkut isumannaatsutut nalilerneqartumik, tigummigallaanermut inissiiffissamik kommunalbestyrelse pissarsissaq.

Imm. 3. Inuup innarluutillip tigummineqarallarnermi nalaani kommunimi najugaqarfigisaani, pisuni imm. 1, nr. 2-imi ilaasuni, piaarnerpaamik, taamaattoq kingusinnerpaamik nalunaaquttap akunnerisa 72-it iluanni, politiinit isumannaallisaanikkut isumannaatsutut nalilerneqartumik, tigummigallaanermut inissiiffissamik pissarsissaq.

§ 53. Kalaallit Nunaanni pinerluttulerinermi inatsimmi § 234 malillugu Kalaallit Nunaanni Pinerluttunik Isumaginnittut aqutsisui angerlarsimaffimmi imaluunniit paaqqinniffimmi naleqquttumi inissiinissaq pillugu aalajangiippata, inuit innarluutillit ulloq unnuarlu neqeroorummi matoqqasumi inissinneqarsinnaapput.

Kapitali 11

Misileraanerit

§ 54. Kommunalbestyrelsit qinnuteqarnerisigut, allaanerusunik tapersiinissaq aamma tapersiinerit allatut ittut tunniunneqarsinnaanerat, kiisalu allatut ittunik najugaqarfissatut neqeroorutininik pilersitsinissaq pillugit Naalakkersuisut akuersissuteqarsinnaapput.

Imm. 2. Akuersissuteqarnermi misileraanermik aqqissuussap nakkutigineqarnissaanut aalajangiisinnaatitaaneq pillugu aalajangersakkanik Naalakkersuisut aalajangersaasinnaapput.

Kapitali 12

Tikeraarluni angalasarnerit

§ 55. Inuk innarluutilik 18-it sinnerlugit ukiulik sumiiffimmut angerlarsimaffimminut ukiumut ataasiarluni akiliunneqarluni tikeraarluni angalasinnaatitaavoq, piumasaqaatit makkua naammassineqarsimappata, taamaattoq takuuk imm. 5:

- 1) § 13 malillugu inuk najugaqaqatigiiffimmiippat, § 14 malillugu najugaqarfimmi illersugaasumiippat, imaluunniit § 18 malillugu ulloq unnuarlu neqeroorummiippat, aamma
- 2) najugaqarfissatut neqeroorut inuup sumiiffimmi angerlarsimaffiata avataani inissisimappat.

Imm. 2. Inuk nammineerluni angalasinnaangippat, tikeraarluni angalaneq ilaqtamut ataatsimut arlalinnulluunniit tunniunneqarsinnaavoq.

Imm. 3. Meeraq innarluutilik, § 18 malillugu ulloq unnuarlu neqeroorummi, meeqqap angerlarsimaffiata sumiiffiata avataanni inissisimasumi, inissinneqarsimasoq, nammineq angerlarsimaffimminut imaluunniit angajoqqaatut oqartussaasut angerlarsimaffiannut ukiumut marloriarluni tikeraarluni angalasinnaatitaavoq. Tikeraarluni angalaneq, meeqqamut tamanna pitsaanerpaappat, angajoqqaatut oqartussaasumut ataatsimut imarluunniit tamaginnut imaluunniit qanigisamut allamut, taassuma meeqqamut ulloq unnuarlu neqeroorummiittumut tikeraarnissaanut, tunniunneqarsinnaavoq. Meeqqap aamma angajoqqaatut oqartussaasunut attaveqaqatigiinnerisa attatiinnarnissaanut tamanna pisariaqarpat, tamannalu meeqqap pisariaqartitsineranut atatinneqarsinnaappat, ukiumut sulii ataasiarluni tikeraarluni angalanissaq tunniunneqassaaq. Meeraq ukiumi meeqqap 18-inik ukioqalerfiani katillugit marloriarluni tikeraarluni angalasinnaatitaavoq.

Imm. 4. Imm. 1-3 malillugit tikeraarluni angalanerit pillugit aalajangersakkat § 50 malillugu inunnut innarluutilinnut Kalaallit Nunaata avataani ulloq unnuarlu neqeroorummiittunut taamaaqataanik atuupput. Inuk 18-it aamma 24-t akornanni ukioqartoq, imm. 1, uniffik siullegg apeqqutaatinnagu, Kalaallit Nunaata avataani ulloq unnuarlu neqeroorummiikkallartoq, sumiiffimmut angerlarsimaffimminut ukiumut marloriarluni tikeraarluni angalasinnaatitaavoq. Inuk, ukiumi inuup 24-nik ukioqalerfiani, marloriarluni tikeraarluni angalasinnaatitaavoq.

Imm. 5. Imm. 1 malillugu inuk innarluutilik 18-it sinnerlugit ukiulik, 18-inik ukioqalereermermi kingorna ukiut 10-it sinnerlugit ulloq unnuarlu neqeroorummiissimasoq, taamaallaat ukiut 2-kkuutaarlugit sumiiffimmut angerlarsimaffimminut tikeraarluni angalasinnaatitaavoq.

Imm. 6. Imm. 1, 3 aamma 4 malillugit tikeraarluni angalaneq, sumiiffimmut angerlarsimaffigisamut imaluunniit sumiiffimmut angajoqqaatut akisussaasut angerlarsimaffigisaannut tikinnissaata ajornakusoornera, ikiortissanik periarfissaqannginnera imaluunniit sumiiffimmi angerlarsimaffigisami atortorissaaruteqannginnera pissutaallutik, ajornarpat, illoqarfimmut angerlarsimaffigisap imaluunniit angajoqqaatut akisussaasut

angerlarsimaffigisaata qanitaaniittumut tunniunneqarsinnaavoq. Illoqarfimmut angerlarsimaffigisap qanittaaniittumut imaluunniit angajoqqaatut akisussaasut angerlarsimaffigisaannut tikeraarluni angalanissamik tunniussisoqarpat, taamatuttaaq angajoqqaatut akisussaasut imaluunniit inuup innarluutillip angajoqqaavinut imaluunniit qanigisaanut allanut angalanissaq unnuisarnissarlu aqqissuunneqassapput.

Imm. 7. Angalanermut kiisalu ullut unnuallu 9-t tikillugit unnuiffissanut aningaasartuutit kommunalbestyrelsip akilissavai. Tikeraarluni angalanerni angalanerup aallartinnera naaneralu ulluni unnuanilu 9-ni pineqartuni ilaatinneqassanngillat. Tamatuma saniatigut kommunalbestyrelsip makku aningaasartuutigissavai:

- 1) imm. 1-3 malillugit tikeraarluni angalanermut atatillugu tapersersorneqarnissamut pisariaqartumut, matumani ingiaqateqarneq aamma immikkut tapersersuinerneq iliuusissat ilanngullugit.
- 2) tikeraarluni angalanerup nalaani ingiaqataasumut, kiisalu ingiaqataasup angerlarsimaffiata aamma najugaqarfissatut neqeroorutip akornanni angalanermut, aamma
- 3) imm. 6 malillugu angajoqqaatut akisussaasut, angajoqqaat imaluunniit qanigisaasut allat angalanerannut unnuisarnissaannullu.

Imm. 8. Tikeraarluni angalanerit aqqissuunneqartarnerat aningaasartuutillu akilerneqartarnerat pillugit maleruagassanik Naalakkersuisut aalajangersaasinnaapput.

§ 56. Inuk innarluutilik, § 55-imi pineqartunut ilaasoq, ilaqutaasup qanigisaasup perululluni napparsimanerani, toqunerani imaluunniit ilisaaneranut atatillugu Kalaallit Nunaannut imaluunniit Kalaallit Nunaata iluani angalanermut 1-mut akiliunneqarnissaminut pisinnaatitaavoq.

Imm. 2. Angalanermut kiisalu ullut unnuallu 9-t tikillugit unnuiffissanut aningaasartuutit kommunalbestyrelsip akilissavai. Tikeraarluni angalanerni angalanerup aallartinnera naaneralu ulluni unnuanilu 9-ni pineqartuni ilaatinneqassanngillat. Tamatuma saniatigut kommunalbestyrelsip makku aningaasartuutigissavai:

- 1) imm. 1 malillugu angalanermut atatillugu tapersiinerneq pisariaqartumut, matumani ingiaqateqarneq aamma ittumik tapersiinerneq iliuuseqarnerit ilanngullugit, aamma
- 2) angalanerup nalaani ingiaqateqarneq, kiisalu ingiaqataasup angerlarsimaffiata aamma najugaqarfissatut neqeroorutip akornanni angalanerup.

Imm. 3. Inuk innarluutilik, § 65-imi pineqartunut ilaasoq, annertunerusumik nalliuttorsiorpat imaluunniit perululluni napparsimappat, ilaqtutani qanigisamut ataatsimut arlalinnuunniit Kalaallit Nunaannut imaluunniit Kalaallit Nunaata iluani angalanissamut kommunalbestyrelse tapersiisinnaavoq.

Imm. 4. Tikeraarluni angalanerit aqqissuunneqartarnerat aamma aningaasartuutit akilerneqartarnerat pillugit maleruagassanik Naalakkersuisut aalajangersaasinnaapput.

Kapitali 13

Illerfimmik angallassineq

§ 57. Inuit, § 55-imi pineqartunut ilaasut, sumiiffimmi angerlarsimaffigisamik avataaniittumiitillutik toqukkut qimagunneranni, illerfiup assartornissaanut aningaasartuutit tamakkiisumik ilaannakortumilluunniit matussutissaattut kommunalbestyrelse tunniussisinnaavoq.

Kapitali 12

Tapersiinerup allangortinneqartarnera atorunnaarsinneqartarneralu

§ 58. Inuk innarluutilik pisariaqartumik tapersorsorneqarneraq kommunalbestyrelsip ingerlaavartumik nalilersortassavaa.

Imm. 2. Tapersiinerup inuup pisariaqartitaannik naammassinniffiusinnaajunnaarnerani, inummut innarluutilimmut tapersiineq allangortinneqassanersoq, kommunalbestyrelsip aalajangissavaa.

Imm. 3. § 23 malillugu tapersiinerup allangortinneqarnissaa pillugu aalangiisoqannginnerani, inuk innarluutilik tassungalu angajoqqaatut sinniisoqarsimaguni sinniisup imaluunniit angajoqqaatut akisussaasut kommunalbestyrelsip oqaloqatigisimassavai.

Imm. 4. Inuup pisariaqartitaasa naammassinissaannut tapersiineq pisariaqarunnaarpat, inummut innarluutilimmut tapersiinerup unitsinneqarnissaa pillugu kommunalbestyrelse aalangiisaaq.

Imm. 5. Kapitali 8-mi aalajangersakkat malillugit tapersiinerup unitsinneqarnissaanik aalangiisoqannginnerani kommunalbestyrelse:

- 1) § 26 malillugu iliussissanut pilersaarummik suliaqarsimassaaq, aamma
- 2) inuk innarluutilik tassungalu angajoqqaatut akisussaasoqarpat akisussaasut imaluunniit angajoqqaatut akisussaataasut oqaloqatigereersimassavai.

§ 59. Inummut innarluutilimmut kapitali 9-mi aalajangersakkat malillugit najugaqarfissatut neqeroorummiinnerup unitsinneqarnissaa pillugu kommunalbestyrelsip aalangiinnginnerani, kommunalbestyrelsip qulakkiissavaa:

- 1) inuup najugaqarfissatut neqeroorummit angerlartinneqareernerata kingorna pisariaqartitaasa naammassineqarnissaannut pisariaqartumik inuup tapersorsorneqarnissaa,
- 2) inuup najugaqarfissatut neqeroorummit angerlartinneqareernerata kingorna tapersiinerup § 26 malillugu iliussissanut pilersaarummik suliaqartoqarnissaa,
- 3) § 23 malillugu, inuup immaqalu tassunga angajoqqaatut sinniisuata imaluunniit angajoqqaatut akisussaasut oqaloqatigineqarsimanissaat, aamma
- 4) najugaqarfissatut neqeroorummit allaganngorlugi oqaaseqaammik piniartoqarsimanissaa, taassuma inuup innarluutillip inissinneqarunnaassaguni inissinneqarunnaarnissaanut kiisalu nalinginnaasumik atugarissaarnerata tapersorsorneqarnissamillu pisariaqartitsiinnarata killiffii pillugit inissiivigineqarsimasup isummersornera imarissavaa.

Imm. 2. Meeqqap innarluutillip najugaqarfissatut neqeroorummiinnerata unitsinneqarnissaa pillugu kommunalbestyrelsip aalajangiinginnerani, imm. 1-imi piumasagaatit saniatigut kommunalbestyrelsip aamma qulakkiissavaa:

- 1) meeqqap najugaqarfissatut neqeroorummiikkunnaarnissaata piffissami siuninnguani kinguninnguani meeqqamut, angajoqqaatut akisussaasuinut meearlu attaveqarfeqarpat attaveqarfiinut tapersiissuteqartoqassappat tapiissutaasinnaasunik piareersaneq,
- 2) najugaqarfissatut neqeroorummiikkunnaarnermut meeraq, angajoqqaatut akisussaasut imaluunniit qanigisaasut allat piareersarluarsimanissaat.

Imm. 3. Imm. 1, nr. 4 malillugu najugaqarfissatut neqeroorut oqaaseqaateqarsimappat, tassani innersuussutigineqarpat inuk najugaqarfissatut neqeroorummiiginnassasoq, taava najugaqarfissatut neqeroorummiikkunnaarnissap aalajangiiffigineqannginnerani kommunalbestyrelsip § 11, imm. 1, nr. 7 malillugu Inunnut innarluutilinnut Sullissivik Nunamut Tamarmut Atuttoq oqaaseqaateqarqullugu piunaffigissavaa. Najugaqarfissatut neqeroorummiikkunnaarnissaq pillugu aalajangiisoqartinnagu Inunnut innarluutilinnut Sullissiviup Nunamut Tamarmut Atuttup oqaaseqaataata tiginissaa kommunalbestyrelsip utaqqissavaa.

Imm. 4. Imm. 1 malillugu najugaqarfissatut neqeroorummiinnerup unitsinneqarnissaa, inummut innarluutilimmut tunngatillugu mianerisassat imaluunniit mianerisassat annertuut allat ilimasaarinissamut piffissaliussap taassuma saneqqunneqarnissaa pisariaqartissimangippassuk, inissinneqarnerup unitsinneqarnissaa sioqqullugu minnerpaamik sapaatit akunnerinik 12-inik ilimasaarutigineqassaaq. Inuup innarluutillip imaluunniit tassunga angajoqqaatut sinniisoqarsimaguni sinniisuata inissisimanerup unitsinneqarnissaa erseqqissumik allakkatigullu akuerisimappassuk, sapaatit akunnerini 12-ini ilimasaarinissaq pillugu piumasagaat saneqqunneqarsinnaavoq.

Imm. 5. Imm. 1, nr. 1-3-imi aamma imm. 2-imi aalajangersakkat, inuit innarluutillit, Kalaallit Nunaata avataani najugaqarfissatut neqeroorummiinnerisa unitsinneqarnissaat pillugu kommunalbestyrelsip aalajangiinerinut taamaaqataanut atuupput. Kommunalbestyrelse aamma inissisimanerup unitsinneqarnissaa pillugu aalajangiisoqannginnerani, Kalaallit Nunaata avataani kommunimi najugarisamit allaganngorlugu nassuiaammik piniassaaq.

Kapitali 15

Nakkutilliineq

§ 60. Kapitali 9 aalajangersakkat malillugit inunnut innarluutilinnut inissatut neqeroorummiittunut, inummut tunngatitamik kommunalbestyrelse nakkutilliissaaq. Nakkutilliinerminut ilaatillugu, inissatut neqeroorummiinnermi inuup timikkut, tarnikkut inooqatigiinnikkullu pisariaqartitai suli naammassineqarnerisut kommunalbestyrelsip qulakkiissavaa.

Imm. 2. Kapitali 3-imi aalajangersakkat malillugit najugaqatigiiffinnut najugaqarfinnullu illersugaasunut kommuninit pilersinneqarsimasunit ingerlanneqartunillu ingerlatsinermut tunngatitamik kommunalbestyrelse nakkutilliissaaq.

Imm. 3. Imm. 1 aamma 2 malillugit nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

Imm. 4. Naalackersuisunit qinnuigineqarneq tunngavigalugu, kommunalbestyrelsip nakkutilliinermik ingerlatsineranut paasissutissat kissaatigineqartut tamaasa nassiunneqarnissaat, kommunalbestyrelsip pisussaaffigaa.

Imm. 5. Inummut tunngatitamik aamma ingerlatsinermut tunngatitamik nakkutilliinermut maleruagassanik erseqqinnerusunik Naalackersuisut aalajangersaasinnaapput, matumani ilanngullugit:

- 1) kommunalbestyrelsip nakkutilliisussaatitaanerminik ingerlatsinera,
- 2) nakkutilliinermik aaqqissuussinera,
- 3) nakkutilliisussaatitaanerup naammassineqarnissaanut atugassarititaasut piumasaqatillu, aamma
- 4) kommunalbestyrelsip nakkutilliinermut nalunaarusiamik suliaqartarnera.

§ 61. Naalackersuisut qitiusumik nakkutilliinermik ingerlatsivimmik peqassapput (nakkutilliinermik ingerlatsivik).

Imm. 2. Kommunalbestyrelsip Inatsisartut inatsisaanni matumani maleruagassanik ingerlatsineranik allaffissornikkullu aqutsineranik pingaarnertut nakkutilliinermik ingerlatsivik nakkutilliissaaq.

Imm. 3. Kapitali 3-mi aalajangersakkat malillugit ulloq unnuarlu neqeroorutitut pilersinneqarsimasunut ingerlatsinermut tunngatitamik nakkutilliinermik ingerlatsivik nakkutilliissaaq.

Imm. 4. Nakkutilliinermik ingerlatsiviup imm. 3 malillugu ingerlatsinermut tunngatitamik nakkutilliinermiut ilaatillugu, ulloq unnuarlu neqeroorutini pissutsit nakkutigissavai aammalu ulloq unnuarlu neqeroorummik oqaloqateqarneq ingerlatissallugu.

Imm. 5. Imm. 2 aamma 3 malillugit nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

Imm. 6. Ingerlatsinermut sammisumik nakkutilliinerup aaqqissuunneqarnera aammalu imarisassai pillugit maleruagassanik erseqqinnerusunik Naalackersuisut aalajangersaassapput.

§ 62. Nakkutilliinermik ingerlatsiviup pisariaqartumik kinaassutsimut uppersaammik takutitsinermigut eqqartuussivimillu aalajangiivigineqaaqqaanngitsumik, paasissutissat kommunip ingerlatsiviata pigisai tamaasa § 61, imm. 2 malillugu nakkutilliinermiut naleqquttuusorisatik takusinnaavaat, tamatumunnga aamma ilaapput paasissutissat inunnet tunngasut mianerisariaqartut kiisalu suliffiup iluani allattugaatigineqartut.

Imm. 2. Nakkutilliinermik ingerlatsivik allaganngorlugu nakkutilliinermut nalunaarusiamik suliaqassaaq tassanilu § 61, imm. 2 malillugu nakkutilliineq pillugu kommunalbestyrelsimut

najoqqutarineqarsinnaasunik piumasqaateqassalluni. Nakkutilliinermik ingerlatsivik aammattaaq nakkutilliineq tunngavigalugu kommunalbestyrelsimut pisussaaffiliisumik makkuninnga peqqusissuteqarsinnaavoq:

- 1) Inatsisartut inatsisaat manna aallaavigalugu kommunalbestyrelsip § 25 malillugu suliani ingerlanneqartuni sullissinermik qulaajaaneq aallartissagaa, imaluunniit § 36 malillugu iliussissanut pilersaarusiussasoq, taakkulu suliamik suliaqarnermi aallartitsinerit piffissap nakkutilliinermik ingerlatsiviup aalajangigaata iluani naammassineqarsimassapput. Suliap imaluunniit suliat qanoq ingerlanerat pillugu nakkutilliinermik ingerlatsiviup kommunalbestyrelsip ataavartumik paasissutissiisarnissaa piumasqaatigisinnaavaat.
- 2) Nakkutilliinermik ingerlatsiviup nakkutilliinerminnut atatillugu naliliippat, suliani pineqartuni kommunalbestyrelse Inatsisartut Inatsisaanni matumani aalajangersakkanik malinnissimanngitsoq, kommunalbestyrelse suliamik naammassineqarsimasumik kingumut aallartitseqqissaq, aamma
- 3) Nakkutilliinermik ingerlatsivimmiit nalilerneqarpat suliami ingerlasumi imaluunniit naammassineqarsimasumi inissatut neqeroorummiinnissaq pisariaqartinneqartoq, tamannali neqeroorutigineqarsimanngitsoq, § 25 malillugu Nakkutilliinermik ingerlatsivimmit piffissaliunneqartup iluani kommunalbestyrelsip qulaajaaneq aallartissavaa.

§ 63. § 61, imm. 3 malillugu ulloq unnuarlu neqeroorummit nakkutilliinermut ingerlatsiviup ingerlatsinermut sammititamik nakkutilliinerannut atatillugu paasissutissat pisariaqartinneqartut tunniunneqarnissaat Nakkutilliinermik ingerlatsiviup pisinnaatitaaffigaa.

Imm. 2. Nakkutilliinermut ingerlatsivik ulloq unnuarlu neqeroorummut peqqusissuteqarsinnaavoq. Nakkutilliinermik ingerlatsivik peqqusissutip naammassineqarnissaanut piffissaliussisinnaavoq.

Imm. 3. Ulloq unnuarlu neqeroorutini ataasiakkaani pissutsit taamaattussaattippassuk, annertusisamik nakkutilliinissaq pillugu nakkutilliinermut ingerlatsivik aalangiisinnaavoq.

Imm. 4. Nakkutilliinermik ingerlatsiviup paasippagu ulloq unnuarlu neqeroorummi ernumanartoqartoq, kommunalbestyrelsit inissiisimasut nakkutilliinermik ingerlatsiviup nalunaarfigissavai.

Imm. 5. Qaqugukkut annertusisamik nakkutilliinermik aallartitsisoqarsinnaanersoq, aammalu qaqugukkut peqqusissuteqartoqarsinnaanersoq pillugit maleruagassat erseqqinnerusut Naalakkersuisut aalajangersassavaat.

Kapitali 16

Inunnut innarluutilinnut siunnersuisooqatigiit, inunnut innarluutilinnut politikki aamma pitsaassusissanut malitassat

§ 64. Kommunalborgestrelse inunnut innarluutilinnut siunnersuisooqatigiinnik pilersitsissaaq. Inunnut innarluutilinnut siunnersuisooqatigiit inunnut innarluutilinnut politikikkikut apeqqutini kommunalborgestrelsimut siunnersuissapput aammalu innuttaasup aamma

kommunalbestyrelsip akornanni najukkami politikikkut apeqqutit tamaasa, inunnut innarluutilinnut tunngasut pillugit isummersuutininik ingerlatitseqqiisassallutik.

Imm. 2. Kommunalbestyrelsip inunnut innarluutilinnut siunnersuisooqatigiit suliniutit inunnut innarluutilinnut pingaaruteqartut tamaasa pillugit tusarniaaffigisassavai.

Imm. 3. Inunnut innarluutilinnut siunnersuisooqatigiit apeqqutit inunnut ataasiakkaanut tunngasut suliarisinnaangilaat.

Imm. 4. Inunnut innarluutilinnut siunnersuisooqatigiinni ilaasortat sisamat aamma arfineq pingasut akornanni amerlassuseqarput. Inunnut innarluutilinnut siunnersuisooqatigiit, kommunalbestyrelsimiit aallartitanik, kommunimi imaluunniit allani isumaginninnermut suliassa qarfinni kommune sullillugu suliassanik attuumassuteqartunik suliqaartartuni sulisunik, aammalu inuit innarluutilit peqatigiiffiinit aallartitanik, amerlaqatigiinnik ilaasortaqaartillugit katitigaassapput. Kommunalbestyrelse inunnut innarluutilinnut siunnersuisooqatigiinni aallartitaqassaaq.

Imm. 5 Inunnut innarluutilinnut siunnersuisooqatigiit pisariaqartinneqartumik allattoqarfeqarnermi suliassaannut kommunalbestyrelse ikiutissaaq.

Imm. 6. Inunnut innarluutilinnut siunnersuisooqatigiit suliqaarnerat katitigaanerallu pillugit maleruagassanik erseqqinnerusunik kommunalbestyrelse aalajangersaassaaq.

§ 65. Inunnut innarluutilinnut ataqatigiisumik politikkimik kommunalbestyrelse ilusilersuissaaq. Inuit innarluutilit qanoq sullinneqarnissaat naatsorsuutigineqarsinnaanersoq imaluunniit qanoq pisinnaatitaaffeqarnerisut pillugit, Inunnut innarluutilinnut politikki paasissutissanik imaqassaaq. Kommunalbestyrelsip qanoq iliorluni inunnut innarluutilinnut tunngasut kommunimi suliassa qarfinni tamani politikkini pilersaarusiornernilu aamma ilanngutsinnissaat qulakkiissaneraa pillugu, inunnut innarluutilinnut politikki paasissutissanik imaqassaaq.

Imm. 2. Kommunip inunnut innarluutilinnut politikkimik suliqaarneranut inunnut innarluutilinnut siunnersuisooqatigiit kommunalbestyrelsip akuutissavai.

Imm. 3. Inunnut innarluutilinnut politikki allaganngorlugu ilusilersorneqassaaq aammalu kommunip nittartagaani tamanut tamanut saqqummiunneqassalluni, kiisalu Naalakkersuisunut ilisimatitsissutitut nassiunneqassalluni.

Imm. 4. Inunnut innarluutilinnut politikki sivisunerpaamik ukiut sisamakkaarlugit iluarsineqartassaaq.

§ 66. Inatsisartut inatsisaat manna malillugu inunnut innarluutilinnut tapersiisarnerup pitsaassusissaannik kommunalbestyrelse aalajangersaassaaq. Pitsaassusissat tapersiinerit ataasiakkaat suussusaasa imarisai, annertussusai ingerlanneqarnissaalu pillugit paasissutissanik imaqassapput. Pitsaassusissat aalajangersagaasut qanoq malinnaavigineqassanersut pillugit, Kommunalbestyrelse aalajangiissaaq.

Imm. 2. Kommunalbestyrelsip Inatsisartut inatsisaat manna malillugu tapersiinerisa tamarnik imaluunniit aalajangersimasumik suussuseqartut piviusunngortinneqarnerannut

pitsaassusissanik aalajangersaasoqassanersoq pillugu, kommunalbestyrelse aalajangiisinnaavoq.

Imm. 3. Imm. 1 aamma 2 malillugit pitsaassusissat allaganngorlugit suliarineqassapput. § 65 malillugu immikkut taamatullu inunnut innarluutilinnut politikkip ilaatut, kommunip nittartagaani tamanut ammasumik saqqummiussisoqassaaq. Pitsaassusissanut malitassat ilisimatitsissutitut Naalakkersuisunut nassiunneqassapput.

Imm. 4. Imm. 1 aamma 2 malillugit pitsaassusissat pisariaqartitsineq malillugu aammalu minnerpaamik ukioq allortarlugu, kommunalbestyrelsip iluarsaattassavai.

Imm. 5. Imm. 1 malillugu pitsaassusissat ilusaat imarisaallu pillugit maleruagassanik erseqqinnerusunik Naalakkersuisut aalajangersaasinnaapput.

Kapitali 17

Aningaasalersuineq aamma akigititanik naleqqussaasarneq

Aningaasalersuineq

§ 67. Inatsisartut inatsisaat manna malillugu inunnut innarluutilinnut tapersiinnermut aningaasartuutit kommuninit akilerneqassapput.

Imm. 2. Inatsisartut inatsisaat manna malillugu ulloq unnuarlu neqeroorutit pilersinneqarnerannut ingerlanneqarnerannullu attuumassuteqartut, Naalakkersuisunit akilerneqartassapput.

Imm. 3. § 19 malillugu ulloq unnuarlu neqeroorutip ingerlanneqarnera kommunit akigititanik akiliisarnerannit aningaasalersorneqassaaq.

Imm. 4. Inatsisartut inatsisaat manna malillugu kommunit tamarmik immikkut namminneq najugaqaqatigiiffiutiminnik aamma najugaqarfiutiminnik illersugaasunik pilersitsinerminnut ingerlatsinerminnullu aningaasartuutitik akilertassavaat.

Imm. 5. Inuk innarluutilik Kalaallit Nunaanni oqartussaasut tapersiinnissamut iliuseqarnerisigut Kalaallit Nunaata avataani inissinneqarsimappat, Inatsisartut inatsisaat manna malillugu tapersiinnermut aallartinneqartumut aningaasartuutitut atatillugu iliuseqartussaataitaneq aamma utertillugit akiliisarneq pillugit maleruagassanik erseqqinnerusunik Naalakkersuisut nunatsinni ingerlatsivinni oqartussat allat isumaqatigalugit aalajangersaasinnaapput.

§ 68. § 49 malillugit inunnut innarluutilinnut ulloq unnuarlu neqeroorummi inissinneqartunut tunngatillugu, kommunit akigititamut akiliuteqarnissaat ulloq unnuarlu inissiinnermut ataatsimut aningaasartalerlugu naatsorsorneqassaaq.

Imm. 2. Ulloq unnuarlu neqeroorut meeqqanut innarluutilinnut § 49 malillugu ulloq unnuarlu neqeroorummi inissinneqartunut kaasarfimmiussanik atisassarsiutissanillu tunniussissaaq.

Imm. 3. Imm. 1 malillugu kaasarfimmiussanut atisassarsiutissanullu aningaasartat kommunit akigititamut akiliutaanni ilaatinneqarput.

Imm. 4. Akigititamut akiliutissaq imm. 1-imi taaneqartoq pillugu maleruagassanik erseqqinnerusuni Naalakkersuisut aalajangersaasinnaapput, matumani aningaasartuutit suut kommunit akiliutaanni ilaatinneqassanersut pillugu aalajangersakkat ilanngullugit.

Imm. 5. Imm. 2 malillugu kaasarfimmiussat atisassarsiutissallu pillugit maleruagassanik erseqqinnerusunik Naalakkersuisut aalajangersaasinnaapput, matumani tunniussisarneq aamma aningaasartat annertussusissaat ilanngullugit.

Akigititanik iluarsisarneq

§ 69. Akigititat Inatsisartut inatsisaat manna malillugu inatsimmi tunngavissinneqartut ukiumut ataasiarluni iluarsineqartassapput.

Imm. 2. Akigititanik ukiut tamaasa ulloq 1. januar naatsorsorneqartunik aalajangersaaneq Naalakkersuisut tamanut saqqummersittassavaat.

Kapitali 18

Naammagittaalliorneq

§ 70. Inatsisartut inatsisaat manna malillugu kommunalbestyrelsit aalajangiisarneri isumaginnittoqarfiup aqunneqarnera aaqqissuussaanageralu pillugit Inatsisartut peqqussutaanni aalajangersakkat malillugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

Imm. 2. Inuk innarluutilik imaluunniit taassuma suliami sinniisuutitaa, ilanngullugu § 24 malillugu illersorti, naammagittaalliummik imm. 1 malillugu suliakkiussinissaq pillugu Inunnut Innarluutilinnut Sullissivimmit Nunamut Tamarmut Atuuttumit siunnersorneqarnissamik ilitsersorneqarnissamillu qinnuteqarsinnaavoq.

Imm. 3. Isumaginninnermi Naammagittaalliuuteqartarfik imm. 1 malillugu naammagittaalliummik suliaqarnerminut ilaatillugu Inunnut Innarluutilinnut Sullissivimmit Nunamut Tamarmut Atuuttumit oqaaseqaammik piniarsinnaavoq. Inunnut Innarluutilinnut Sullissiviup Nunamut Tamarmut Atuuttup oqaaseqaammik suliaqarneranut atatillugu, paasissutissat suliap suliarineqarnissaanut pingaaruteqarpata, Isumaginninnermi Naammagittaalliuuteqartarfik aamma Inunnut Innarluutilinnut Sullissivik Nunamut Tamarmut Atuuttoq inummut paasissutissanik tunngassuteqartunik paarlaasseqatigiissinnaapput, matumani paasissutissat inummut tunngassutillit mianerisariallit ilanngullugit. Paasissutissanik paarlaasseqatigiinneq aatsaat inuup suliami pineqartup, imaluunniit taassuma angajoqqaatut sinniisuata imaluunniit angajoqqaatut akisussaasuata akuersineratigut pisinnaavoq.

Kapitali 19

*Aalajangersakkat allat**Kisitsisitigut paasissutissat*

§ 71. Kommunalbestyrelse kisitsisitigut paasissutissanik assigisaannillu, Naalakkersuisut piumasarisaannik, nassiussinissamik pisussaaffeqarpoq.

Imm. 2. Imm. 1 malillugu kisitsisitigut paasissutissat assigisaallu nassiunneqartussat, annertussusissaat aammalu taakkua qanoq nutarterneqartassanersut nassiunneqartassanersullu pillugit maleruagassanik Naalakkersuisut aalajangersaasinnaapput.

Pineqaatissiisarnermut aalajangersakkat

§ 72. Inatsisartut inatsisaanni matumani aalajangersakkat naapertorlugit kommunalbestyrelsip oqartussatut pisussaaffiisa naammassinissaat annertuumik imaluunniit arlaleriarluni sumiginnarpagu imaluunniit qarsupippagu, Naalakkersuisut kommunalbestyrelse pinngitsaaliissummik akiliinissamik pisussaaffilersinnaavaa, matumani ullormut akiliisitsinerit ilanngullugit.

Imm. 2. Pinngitsaaliissummik akiliisitsinerit Inatsisartut inatsisaanni matumani inatsimmi tunngaveqartut, Nunap karsianut tutsinneqassapput.

Kapitali 20*Atuutilersitsinermut ikaarsaarnermullu aalajangersakkat*

§ 73. Inatsisartut inatsisaat manna ulloq 1. januar 2020 atuutilerpoq.

Imm. 2. Peqatigisaanik innarluutillit ikiorserneqartarnerat pillugu Inatsisartut peqqussutaat nr. 7, 3. november 1994-imeersoq atorunnaarsinneqarpoq.

Imm. 3. Allaffissornikkut peqqussutit Inatsisartut peqqussutaanni imm. 2-imi taaneqartumi inatsisitigut tunngaveqartumik aalajangersagaasut, taakkua taarserneqarnissaasa imaluunniit inatsimmi matumani imaluunniit Inatsisartut inatsisaanni allani inatsisitigut tunngaveqartumik maleruagassanik aalajangersaanikkut atorunnaarsinneqarnissaasa tungaanut, atuutiinnassapput.

Kim Kielsen